

একাত্তরের স্মৃতিকথা এবং তারপর ..

মোল্লা বাহাউদ্দিন

কৈফিয়ত

(এখন আমি ৬৩ বছর পেরিয়ে গেছি। মুক্তিযুদ্ধের স্মৃতি নিয়ে একটা লেখা লিখার ইচ্ছা অনেক দিন থেকে। লিখব লিখব করে লেখা হয়নি। স্বাধীনতার পর মুক্তিযোদ্ধার কাজকর্ম স্বচক্ষে দেখেছি। প্রবাসে আছি ৩৪ বছর। প্রবাসে মুক্তিযোদ্ধার কর্মকাণ্ড কথাবার্তা চোখ দিয়ে দেখেছি, কান দিয়ে শুনেছি। কোন প্রশ্ন করিনি। যখন কোন অমুক্তিযোদ্ধা মুক্তিযোদ্ধা হিসেবে পরিচয় দেয় তখন ভাবি সে একজন মুক্তিযুদ্ধের পক্ষের লোক। তাতে উপকার ছাড়া অপকার কিছুই নেই। পরবাসে মুক্তিযোদ্ধা হিসেবে পরিচয় দিয়ে কোন সুযোগ সুবিধা নেবার সুযোগ নেই। মুক্তিযোদ্ধা হিসেবে পরিচয় দিয়েই তারা খুশি। তাতে কারো কিছু যায় আসে না। কিন্তু একজন অমুক্তিযোদ্ধা যখন একজন প্রকৃত মুক্তিযোদ্ধাকে প্রশ্ন করে, ‘আপনি আবার মুক্তিযোদ্ধা হলেন কবে’? তখন তাদের মুখোশ উন্মোচন করা প্রয়োজন হয়ে পড়ে এবং একজন মুক্তিযোদ্ধার দায়িত্ব হয়ে পড়ে। নিউইয়র্কে রাজাকারের সহযোগিকে মুক্তিযোদ্ধা হিসাবে আর এক অমুক্তিযোদ্ধা পুরস্কৃতও করেছে। তাই দেখে প্রবাসে মুক্তিযুদ্ধের সঠিক ইতিহাস আমাকে লিখতে হল “স্বপ্ন নগরী নিউইয়র্ক”। কানাডাতে এসে শুধু শুনেই যাচ্ছিলাম। কে কতবড় মুক্তিযোদ্ধা তা নিয়ে আমার মাথা ব্যথা নয়। কিন্তু কিছু স্বঘোষিত মুক্তিযোদ্ধার অদ্ভুত কাহিনী এবং ‘মহা মুক্তিযোদ্ধা’ (!?) উপাধি শুনে চূপ করে থাকা ছাড়া উপায় ছিলনা। তারা অনেক সময় সীমা ছাড়িয়ে যায়। কখনও তাদের প্রতিহত করা প্রয়োজন হয়ে পরে, ইতিহাসের প্রয়োজনে।

আমার স্ট্রোকের পর আমি অনেকটা দৃষ্টিশক্তি ফিরে পেয়েছি কিন্তু হারিয়েছি স্বরনশক্তি। এখন নাম মনে রাখতে পারি না। যে বস্তুটা আমি সর্বদা ব্যবহার করি, আমার সামনেই আছে তার নামটাও মনে করতে পারি না কোন কোন সময়। স্মৃতিকথা লিখতে গিয়ে অনেক নাম হয়ত বাদ পড়বে বা মনে করতে পারবনা তার জন্য আমি ক্ষমাপ্রার্থী)

-- ০ --

প্রথম পর্ব

২০শে মার্চ ১৯৭১ | আউটার স্টেডিয়ামে বঙ্গ বন্ধুর শেষ জনসভায় বঙ্গ কণ্ঠে ঘোষিত হল, “কাল থেকে ব্যাংক চলবে না, অফিস আদালত চলবে না, গাড়ি চলবে না ...”। সভাশেষে দল বেঁধে বাসার পথে পদব্রজে চলছি। পথে তিল ধারণের স্থান নেই। চলতে চলতে স্টেট ব্যাংকের সামনে (বর্তমানে বাংলাদেশ ব্যাংক) এসেই ব্যাংক বিল্ডিংএর দিকে তাকালাম। ভাবলাম কাল অফিসে আসতে হবে না, আর বিহারি অফিসার মাছির (মশিউর রহমান) সাথে ঝগড়া করতে হবে না। এই ব্যাংকে আমার চাকরির আজ দ্বিতীয় বছর। প্রথম নিয়োগ পাবার চার মাস পর থেকেই আমার চাকরি টলমল করছে। এই বুঝি গেল! ব্যাংকে আমি এখন দাগী ঝগড়াটে।

কোন বিভাগই আমাকে নেয় না। চাকরির শুরতেই যে বিভাগে আমাকে প্রথম দেয়া হল, তার ছোট অফিসার থেকে উপরের সবই বিহারি। বাঙালির প্রতি তাদের ব্যবহারই আমাকে ঝগড়াটে করে তুলেছে। বিহারিদের প্রতি একটা বিদ্বেষ সৃষ্টি করেছে। যাক সে কথা পরে হবে। তাকিয়ে দেখলাম মিলিটারি পাহারাদার ঠিক পাহারা দিয়ে যাচ্ছে। মাত্র এক সপ্তাহ হল তাদের এখানে বসিয়েছে। তার আগে ব্যাংকের সিকিউরিটি পাহারা দিত। প্রত্যেক তলায়, প্রত্যেক গেইটে, বাইরে সব জায়গায় এখন মিলিটারি পাহারাদার। দেখলেই মনে একটা ভয়ের সঞ্চার হয়।

মরুপলাশ গ্রুপ অব পাবলিকেশন্স রিয়াদ, সউদীআরব কর্তৃক প্রকাশিত।। পৃষ্ঠা # ১/৩৪

প্রকাশকালঃ ০২বৈশাখ ১৪১৭বাঙলা। ১৫এপ্রিল ২০১০

তখন থাকি বাসাবো। কমলাপুরের পথ ধরে চলোছি। রেল স্টেশনের কাছে আসতেই মাথায় একটা বৃষ্টি এসে গেল। আরে! কাল থেকে তো রেল চলবে না! অফিসেও যেতে হবে না! কি মজা! তাহলে বাড়ি চলে যাই না কেন! মা-কে দেখি না দু মাস হল। এ সুযোগে ঘুরে আসি। ভাবতে ভাবতে স্টেশনের কাছে এসে দেখি মানুষের ভীড়, ঠেলাঠেলি হৈচৈ চিংকার। সবাই যাত্রী। টিকেট কাউন্টার বন্ধ। রেল গাড়ি ছাড়ছে না। গাড়ির ড্রাইভার বোধ হয় আমার চেয়েও বেশি ফাঁকিবাজ। আমি তো কাল থেকে সুযোগ নেব, আর এই রেলগাড়ীর ড্রাইভার এখন থেকেই নিচ্ছে। রেল বন্ধ। সবগুলো রেলগাড়ী পাথরের মত দাঁড়িয়ে আছে। আমার সাথে ছিল জিয়া। (সিলেটের জিয়াউদ্দিন, পরবর্তীতে ঢাকা মিউনিসিপালিটির প্রধান ব্যবস্থাপক।) তাকে বললাম, জিয়া তুই বাসায় খবরটা দিয়ে দিস, আমি বাড়ী চললাম।

স্টেশনে আগত এই জনস্রোতের একটাই দাবী, এখন রেল চলতে হবে, বন্ধ হবে কাল থেকে। বঙ্গবন্ধু বলেছেন কাল থেকে রেল বন্ধ। তাহলে আজ রাতে চলবে না কেন! এই ভীড়ের মাঝে দাঁড়িয়ে ব্যাপারটা বুঝলাম। তাই! এখন বন্ধ করা মানে বঙ্গবন্ধুর আদেশ অমান্য করা। সেই সময় একটা সুবিধা ছিল। এ ধরনের জনস্রোতে যে কেউ সাহস করে দাঁড়িয়ে কথা বলতে পারলেই সে হয়ে যেত লিডার মানে নেতা।

তার পেছনেই জনস্রোত চলতে থাকে নদীর জলের মত। এমন অনেক নজীর আছে, বর্তমানে বাংলাদেশে এমন বেশ কিছু মহা নেতা এখন রাজনীতির মাঠে আছে। আমার তখন মনে হল বাড়ি যাওয়া আমার খুব প্রয়োজন। এই ঘন্টাখানেক আগেও এমন তীব্র টান অনুভব করিনি। যেই ভাবলাম বাড়ী যাব তখনই এটা হয়ে গেল জরুরী।

একটু দাঁড়িয়ে, দু'একজনের সাথে কথা বলে বুঝলাম, স্টেশন মাস্টার ইচ্ছে করলেই রেল চালাতে পারে। আমি বললাম, ভাইসব শুনুন ..। তখন ভাইসব কথাটার একটা বিশেষত্ব ছিল। সবাই কান খাড়া করে নেয় কিছু শোনার জন্য। বললাম, চলুন আমরা স্টেশন মাস্টারের কাছে যাই। তাকে ব্যাপারটা বুঝিয়ে বলি। তিনি নিশ্চয়ই শুনবেন। আর যায় কোথায়! সবাই এক বাক্যে চলুন, চলুন বলে চিংকার করে উঠল। আমি হয়ে গেলাম ক্ষণিকের নেতা। স্টেশন মাস্টারের ঘরের দিকে চললাম। আমার পেছনে মানুষের স্রোত। পেছনের অনেকেই জানে না, কোথায়, কেন, কে যাচ্ছে। কিন্তু জনস্রোত চলছে।

স্টেশন মাস্টারের রুমে ঢুকলাম। পেছনে জনস্রোত। স্টেশন মাস্টার বাইরে তাকিয়ে দেখলেন। তিনি হয়ত ভাবলেন আমি কোন ছাত্রনেতা। সেলাম দিয়ে বললাম, বাইরের এই হাজার হাজার মানুষের একটা দাবী, এখন একটা গাড়ি চলুক। তাছাড়া রেল তো কাল থেকে বন্ধ হবার কথা। এখন ঢাকা টু চিটাগাং একটা গাড়ি ছাড়ার ব্যবস্থা করুন। এসব হাজার হাজার মানুষের চিংকার, গালাগালি বন্ধ করুন।

দেখলাম সহজেই কাজ হল। তিনি বললেন, দু'নম্বর প্রাটফর্মের গাড়িটা যাবে। আমি ব্যবস্থা করছি। শুনে এসব যাত্রীর মাঝে স্বস্তি ফিরে এল। হুর হুর করে সবাই আসন দখল করে নিল। আমিও এক কোনে একটু বসার জায়গা করে নিলাম।

গাড়ীটা শেষ পর্যন্ত ছাড়ল রাত নয়টায়। মুক্তিযুদ্ধ শুরু হবার আগে এটাই শেষ গাড়ী। ঢাকা টু চিটাগাং। একটা বিশেষ গাড়ী। কোন টিকেটের বালাই নেই, টিকেট চেকার নেই। শুধু চালক। আমরা যাত্রীরা যেন সবাই ভিআপি। সারাজীন তো টিকেট নিলই, একটা গাড়ী না হয় টিকেট ছাড়া গেল তাতে এমন কি ক্ষতি! ভিতরে বসে তখনও বুঝিনি গাড়ীর যাত্রী কত হতে পারে। টংগী ছাড়িয়ে গাড়ী বাঁক নিতেই দেখলাম ভিতরে যত যাত্রী, তার দ্বিগুন উপরে। এই বিশেষ গাড়ীটা তার বিশেষত্ব নিয়ে প্রত্যেক যাত্রীকে তাদের বাড়ীর সামনে নামিয়ে দিয়ে যেতে যেতে রাত চারটার সময় পৌঁছল ভৈরব স্টেশনে।

কতবার কোন কোন জায়গায় চেন টানা হয়েছিল তা মনে রাখার মন ছিলনা তখন। একসময় কিছুক্ষন ঘুমিয়ে নিলাম। অবশ্য আমি ইচ্ছে করে ঘুমাইনি। চোখ নিজে থেকেই বন্ধ হয়ে গেল। চোখ খুলে দেখি গাড়ী আখাউরা জংশনে থেমে আছে। আর মাত্র দুটা স্টেশন। তারপরই কসবা। আহ, প্রায় এসে পড়েছি। তখন সকাল ছয়টা।

গাড়ি আবার চলল। আমার বাড়ী ইমামবাড়ী আর কসবা স্টেশনের মাঝ বরাবর। বাড়ী বরাবর গিয়ে চেন টানলেই আমার জন্য সুবিধা। তাছাড়া এই ট্রেনটা তো আমাদের জন্যই। বাড়ী বাড়ী পৌঁছে দেবার জন্য। আমার বাড়ী বরাবর আসতেই চেন টানতে যাব তার আগেই ট্রেন থেমে গেছে। বাহু, খুব মজা তো! তাড়াতাড়ি নেমে পড়লাম। গাড়ী চলে যাবার পর দেখলাম আমার আশেপাশের গ্রামের বেশ কয়েকজন। যে যার পথে যাচ্ছে। কেউ উত্তরে, কেউ দক্ষিণে, কেউ পশ্চিমে। আমি যাব পূর্বে। বর্ডারের দিকে। পূর্বের কোন মানুষ দেখলাম না।

এটাই শেষ এবং বোধ হয় প্রথম রেলগাড়ী হোম সার্ভিস দিল। সব যাত্রীকে তার বাড়ী বাড়ী পৌঁছে দিয়ে ২০ তারিখে রওয়ানা দিয়ে ২৪ তারিখে সকাল সাতটায় পৌঁছলাম। কসবা পর্যন্ত পৌঁছতে লাগল দশ ঘণ্টা। যেখানে ঢাকা থেকে সব স্টেশনে থেমে কসবা পৌঁছতে লাগে তিন ঘণ্টা। কসবা থেকে চিটাগাং পৌঁছতে কত সময় লেগেছিল আমার জানা নিই। আলী আকবরের পাটিগনিতের ফর্মুলা নিয়ে অংক কষলে হয়ত কেউ বের করতে পারবেন।

ক্ষেতের আল ধরে সড়কে উঠলাম। বাড়ী পৌঁছলাম সকাল আটটার দিকে।

এই অসময়ে আগমন দেখে বাড়ীতে একটা হৈ চৈ পড়ে গেল। বললাম, ফ্রি গাড়ীতে আসলে এমন অসময়েই আসতে হয়। মায়ের এসব জানার প্রয়োজন নেই, আমি এসেছি তাঁর কাছে এটাই বড় কথা।

খেয়েদেয়ে দিলাম ঘুম। ঘুম থেকে উঠলাম বিকেল পাঁচটায়। উঠেই রেডিওটা ছাড়লাম। ঢাকায় যে থম থমে ভাব দেখে এসেছি তার কোন খবর আছে কিনা। না, নতুন কোন খবর নেই। পাড়া ঘুরে এবাড়ী ওবাড়ী করে ফিরলাম নয়টার দিকে। খেয়ে ঘুমিয়ে পড়লাম।

পরের দিন সারাদিন কাটলাম গ্রামের বন্ধুদের সাথে। রাজনীতি নিয়ে তর্ক বিতর্ক হল সারাদিন। আজ পঁচিশে মার্চ। তখনও অনুমান করা যায়নি ঢাকায় কি ঘটতে যাচ্ছে।

২৬শে মার্চ সকাল আটটার দিকে ঘুম থেকে উঠে দেখি মা ভাপা পিঠা প্রস্তুত করে রেখেছে। বলল, তাড়াতাড়ি মুখ ধুয়ে আস। গরম গরম না খেলে মজা পাবে না। উঠানে তোমার চেয়ার দেয়া হয়েছে।

ঘরে না দিয়ে উঠানে কেন? এটা আমার ছোটবেলা থেকে অভ্যাস হয়ে গেছে। শীতের দিনে রোদে বসে মুড়ি খেতাম। তারপর এটা শীতে বসন্তে বার মাসে দাড়াল। সকালে নাস্তা যাই হোক আমি উঠানে রোদে বসে খাই। এতে আমি কি মজা পাই তা নিজেই জানি না। মা জানে আমার নাস্তার জায়গাটা কোথায় হবে। তাই দুটা চেয়ার রাখা হয়েছে উঠানে। একটায় আমি বসব আর একটা টেবিল হিসাবে ব্যবহার করব।

হাতমুখ ধুয়ে এসে বসলাম উঠানে। পিঠা খাচ্ছি আর উঠানের কোনে মান্দার গাছের দিকে তাকাচ্ছি। বেশ কতগুলো লাল ফুল ফুটে আছে। একটা হামিং বার্ড এসে মধু সংগ্রহ করছে ফুল থেকে। প্রকৃতির সৃষ্টি! ফুলের উপর না বসেই, উড়ন্ত অবস্থায় মধু সংগ্রহ।

আমাদের সবচেয়ে আদরের, পরিবারের সবচেয়ে ছোট ভাই রিয়াজ। বললাম রেডিওটা নিয়ে আয়। সে নিয়ে এল এবং চেয়ারের এক পাশে রাখল। অন করে প্রথমে ঢাকা স্টেশন ধরতে চেষ্টা করলাম। কোন শব্দ নেই। মনে করলাম বোধ হয় ইথারের স্বল্পতা। আকাশবানী ঘুরাতেই অতি পরিচিত দেবদুলালের কণ্ঠে ভেসে এল, **‘বাংলাদেশে গৃহযুদ্ধ শুরু হয়েছে.. ..’** আমার হাতের পিঠা হাতেই রয়ে গেল। একি হল! তাহলে রুখে দাড়িয়েছে! আমার খাওয়া বন্ধ হয়ে গেল। চেয়ার থেকে উঠে পায়চারি করছি। কি হল! কি হল! তবে কি স্টেট ব্যাংকে আর্মি দেখে যা সন্দেহ করেছিলাম তই হল! কোথায় কোথায় কি হল, কি হচ্ছে! আকাশবানী বলছে রাজারবাগ পুলিশ লাইন প্রায় নিশ্চিহ্ন! কত লোক মারা গেল!

এর মধ্যে মা আবার গরম পিঠা নিয়ে এল। এসে দেখল মাত্র একটা পিঠা খেয়ে আমি উঠে গেছি!

মায়ের অনুযোগ, একি উঠে গেলে কেন? পিঠা ভাল হয় নাই? তাহলে মুরগী বুনা নিয়ে আসি। আমি তো মনে করলাম কচি লাউয়ের তরকারি পছন্দ করবে। বস, বাবা, আমি নিয়ে আসছি।

না মা, তোমার পিঠা ভাল হয়েছে। এখন আর খেতে পারব না। পরে খাব। এসময় বাবা বেরিয়ে এলেন। জিজ্ঞেস করলেন, আজকে কোন নতুন খবর আছে?

একটু চুপ করে থেকে বললাম, হা, আছে। ঢাকা এখন বধ্যভূমি।

বল কি! বাবা রেডিওতে খবর শুনতে বসে গেলেন।

আমার বাবা একজন মুক্তিযোদ্ধা। লেখাপড়া ছেড়ে দিয়ে বৃটিশবিরোধি আন্দোলনে যোগ দিয়ে বঙ্গ ভঞ্জে ব্যর্থ হয়ে স্বাধীনতার পর নিঃস্ব হাতে বাড়ী এসেছেন। চাচা কোলকাতার বিখ্যাত আইনজীবী হাবিবুর রহমান চৌধুরী। তাঁর সংস্পর্শে থেকে বাবা দেশের কাজ করেছেন। এখনও তিনি রাজনৈতিকভাবে খুবই সচেতন। যখন তখন কংগ্রেসের কথা বার বার স্মরণ করিয়ে দেন। আকাশবানীর খবর বার বার দিচ্ছে। বাবা মনোযোগ দিয়ে শুনলেন। বললেন, তাহলে আর একটা স্বাধীনতা দেখে যাবার সৌভাগ্য হবে আমার।

অনেকক্ষন অস্থিরভাবে পায়চারি করে আবার চেয়ারে বসলাম। বসতে পারলাম না। মনে হল এখনি বোধ হয় আমার কোথাও যেতে হবে। কোথায় যেতে হবে তা জানি না। তবে বসে থাকতে পারছি না। কোথায় যাব! কোথায় যাব করে হঠাৎ মনে পড়ল নুরুর কথা। নুরু আমার সহপাঠি। ছাত্র ভাল ছিলনা বলে স্কুলে থাকতেই চলে গেল বেঙ্গল রেজিমেন্টে। সে এখন ছুটিতে। আমাদের পাশের গ্রামে তার বাড়ী। কিন্তু আড্ডা হয় আমাদের গ্রামে।

গ্রামের দিকে বেরিয়ে পড়লাম। ভাইপো ফজলুকে পেলাম।(পরে মুক্তিবাহিনীতে যোগ দিয়ে ডালিমের সাথে ছিল)। আমি খবর দেবার আগেই সে বলল, চাচা, সব শেষ। কত লোক যে মারা গেছে কে জানে। আমাদের আত্মীয়স্বজন যারা থাকে তাদের খবর জানার জন্য কান্নাকাটি শুরু হয়েছে। তুমি আগেই চলে এসেছ ভাল করেছ। কথা বলতে বলতে আমরা চলে গেলাম স্কুলের মাঠে। ওখানেই আমাদের আড্ডা বসে। দেখতে দেখতে আরও অনেকেই এসে যোগ দিল। সবাই জেনে গেছে ঢাকার খবর। আলোচনা সমালোচনা চলল। বললাম, চল নুরুর কাছে যাই। দেখি সে কি বলে। দশ মিনিট হেটে নুরুর বাড়ীতে গেলাম। সে চলে গেছে চাঁড়িয়ার বাজারে। এই অবস্থায় আমাদের করনীয় কি হবে তা নিয়ে আলোচনা হল।

আপাতত: আমরা বাঁশ দিয়ে তীর ধনুক তৈরি করব। হাজি চাচা এই কাজে পারদর্শি। তাকে সবাই গিয়ে বললাম। তিনি রাজি হয়ে বাঁশ দিয়ে শুরু করলেন তীর ধনুক তৈরি। তীর ধনুক তৈরি হচ্ছে, আমরা তীর ধনুকের সৈনিকরা আলোচনা করছি কিভাবে এসব ব্যবহার করা হবে। এক সময় নুরু এসে হাজির। আমাদের কাণ্ড দেখে সে হাসল। বলল, তীর ধনুক দিয়ে কি করবি? অস্ত্রের মুখে এসব কিছুই না। তোদের কোন ধারণা নাই অস্ত্র কি কিনিষ, কত ভয়াবহ। বাদ দে এসব অদ্ভুদ চিন্তা। এখন অপেক্ষা করতে হবে অবস্থা কোনদিক যাচ্ছে। ইপিআর ক্যাম্পটা কিভাবে দখল করা যায় সেই চিন্তা কর। গ্রামের মানুষের সাথে বসে এ ব্যাপারে কথা বলা দরকার। আমাদের এখন অপেক্ষা করা ছাড়া উপায় নাই।

গ্রামে রাতের খাবার তাড়াতাড়িই হয়ে যায়। আটটার দিকে খাওয়া শেষ হতেই লবখা গ্রামের দুলাভাই এসে উপস্থিত। তিনি চাকরি করেন বেঙ্গল রেজিমেন্টে। দু সপ্তাহ হল ছুটিতে এসেছেন। ঢাকার খবর শুনে তিনি প্রস্তুতি নিয়ে এসেছেন। বললেন, নমুনা ভাল ঠেকছে না। একটা কিছু হবে। আমার মনে হয় আগরতলা গেলে আমরা একটা সব জানতে পারব। তাই আমি প্রস্তুত হয়েই এসেছি। চল কাল আগরতলা থেকে ঘুরে আসি।

বললাম, চলুন যাই। এর মাঝে হয়ত আরও কিছু খবর পাওয়া যাবে। অনেক আলোচনা, সমালোচনা করে অনেক রাতে ঘুমাতে গেলাম।

২৮ তারিখ সকালে ঘুম ভাঙল মায়ের ডাকে। নাস্তা ঠান্ডা হয়ে যাবে। তাড়াতাড়ি হাতমুখ ধুয়ে আস। তাগাদা দিয়ে চলে গেলেন। আমরা দুজন প্রস্তুত হয়ে উঠানে এলাম। দেখি ছোট একটা টেবিলে নাস্তা রেডি। আমরা দুজন খাওয়া শুরু করলাম। রিয়াজ রেডিওটা এনে টেবিলে রেখে চলে গেল।

আমি খাচ্ছি আর রেডিওর নব ঘুরাচ্ছি। দেখি নতুন কিছু কোথাও পাওয়া যায় কিনা। ঘুরাচ্ছি আর কান পেতে আছি। হঠাৎ একটা স্কিন আওয়াজ ভেসে এল, 'এন এ্যাপীল টু দা ওয়ার্ল্ড.. ..'. রেডিওটা কানের কাছে নিলাম। এবার স্পষ্ট শুনতে পেলাম, এ্যান এ্যাপীল টু দা ওয়ার্ল্ড, উই আর এট ওয়ার, প্লিজ হেল্প আস, দিস ইজ মেজর জিয়া, অন বিহাফ অব শেখ মজিবুর রহমান, পিপলস রিপাবলিক অব বাংলাদেশ। ” সাথে সাথে বাংলায় বলছে, আমি মেজর জিয়া বলছি, বঙ্গ বন্ধু শেখ মুজিবুর রহমানের পক্ষ থেকে.. ..” ।

খাওয়া বন্ধ করে দুলাভাই কান পেতে আছেন। আমি আনন্দে নেচে উঠলাম। পেয়ে গেছি দুলাভাই। শুরু হয়ে গেছে! এইষে ভাল করে শুনুন। এই স্টেশনটা কোথায়! স্বাধীন বাংলা বেতারকেন্দ্র! যাক শুরু হয়ে গেছে তাহলে! কে এই মেজর জিয়া! কোনদিন নাম শুনিনি তো! আপনি নিশ্চয়ই জানেন?

না, আমিও শুনিনি। তবে নামে কি আসে যায়! যুদ্ধ শুরু হয়েছে এই বড় কথা। আমি অনুমান করেছিলাম একটা বড় কিছু ঘটতে যাচ্ছে। বলে দুলাভাই বললেন প্রস্তুত হয়ে যাও।

আমি বললাম, আমি প্রস্তুত। এই জিয়া নামে মেজরকে মাথায় নিয়ে নাচতে ইচ্ছে করছে। বেটা বাঘের বাচ্চা!

দুলাভাই বললেন, চল এখনই আগরতলা রওয়ানা দেই। সেখানে গেলেই সব খবর পাওয়া যাবে।

ইন্ডিয়ান বর্ডার আমাদের বাড়ী থেকে মাইল খানেক। আগরতলা আমার বাড়ী থেকে কোনাকোনি হেটে গেলে তিন চার ঘণ্টা লাগে। আর পূর্বদিকে সোজা গিয়ে ইন্ডিয়ান শেখেরকোট বাজার থেকে বাসে গেলে ঘণ্টা দেড়েক লাগে। বাংলাদেশের যে কোন শহর থেকে আগরতলা আমাদের খুব কাছে। বৃটিশ আমলে আগরতলা ছিল এই এলাকার মানুষের প্রধান শহর। আমরা ছিলাম ত্রিপুরা রাজ্যের অধিনে। আমরা ছোট বেলায় আগরতলা যেতাম সিনেমা দেখতে। জীবনের প্রথম সিনেমা দেখেছি আগরতলায়। হলটার নাম এখন মনে নেই। আমাদের অনেক বন্ধু আছে সেখানে।

আমি বললাম, চলুন। প্রয়োজন হলে রাখালদের বাড়িতে থেকে যাব রাত। রাখাল আমাদের অনেকের বন্ধু। তাদের বাড়ী ছিল আমাদের পাশের গ্রামে নয়ামুড়া। মামা বাড়ী আর আমাদের বাড়ির মাঝখানে। বলখেলার মাঠ থেকেই পরিচয়। একদিন হঠাৎ তারা চলে গেল আগরতলা আর তাদের বাড়ীতে এল এক মুসলমান পরিবার আগরতলা থেকে। তারপরও রাখাল মাঝে মাঝে আসে বেড়াতে। গত বছরও এসেছিল গোসাইস্থলের মেলায়।

দুলাভাই জিজ্ঞেস করলেন, যাবে কোন দিক দিয়ে? কোনাকোনি গেলে তো অনেক পথ, তুমি এতটুকু হাটতে পারবে? আমার শরীরের সাইজখানা তখন হাটার মত নয়। বললাম, দুলাভাই থাকতে আমি হেটে যাব কেন?

আমি তো বলছি না, জিজ্ঞেস করছি। তাহলে বাসেই চল।

আমরা প্রস্তুতি নিচ্ছি। এমন সময় বাবা এসে বললেন, তোমরা কাল যাও। আজকে অপেক্ষা কর। নতুন কোন নির্দেশ আসে কিনা দেখ। একটা রেডিও স্টেশন যখন চালু হয়েছে তখন কোন নির্দেশ আসতে পারে। আমরাও ভাবলাম কথাটা ঠিক। আজকের দিনটা অপেক্ষা করাই ভাল।

না, সারাদিন শুধু একই খবর শুনলাম। নতুন কিছু নাই।

পরের দিন সকালে খেয়ে আমরা প্রস্তুতি নিচ্ছি এমন সময় আমাদের গ্রামের হায়দার আলীর মেয়ে জামাই এসে উপস্থিত। সেও যাবে আমাদের সাথে। ঠিক আছে, চল। (এই জামাই স্বাধীনতার পর অশ্রু নিয়ে বামুটিয়ার

রহমানের বাড়ীতে অনৈতিক কাজে লিপ্ত থাকাকালে খুন হয়। খুনি রহমান সব স্বীকার করে এখন যাবৎজীবন জেলে)।

সকাল এগারটার সময় পৌঁছলাম আগরতলা চৌমুহনীতে। কোথায় যাব, আমাদের লোকজন কোথায় আছে, কোন খবরই জানিনা। একটা চা ফলে ঢুকলাম। তিনজন তিন কাপ চা খেতে খেতে দু'একজনকে জিজ্ঞেস করলাম, দাদা এখানে বাংলাদেশের লোকজন কোথায় আছে কিছু খবর জানেন কি?

একজন বলল, জয়বাংলার লোক আপনারা?

এই প্রথম শুনলাম একটা দেশের নাম হয়ে গেছে জয়বাংলা। যা ছিল একটা স্লোগান, যা বঙ্গবন্ধুর মুখেই বাঘের গর্জনে ভেসে যায় আকাশে বাতাসে। বললাম হ্যা, আমরা জয়বাংলার লোক। কার কার আত্মীয় কখন এসে পৌঁছেছে সে তার কিছু খবর দিল। আমি বললাম, না সেসব খবর চাচ্ছি না। চাচ্ছি এখানে জয়বাংলার কোন অফিস করেছে কিনা। একজন বলল, অফিস করেছে কিনা জানি না, তবে কংগ্রেস ভবনে কিছু জয়বাংলার লোক দেখেছি। অফিস কিনা জানি না। আপনারা সেখানে গিয়ে খবর নিতে পারেন।

বললাম, আমরা তো সেরকম খবরই চাচ্ছি। আমরা কংগ্রেস ভবনে পৌঁছলাম।

পৌঁছেই দেখি লতিফ ভাই বসে আছেন। (আব্দুল লতিফ মিয়া, সেক্রেটারি, ইন্টার্ন জোন, গনপ্রজাতন্ত্রী বাংলাদেশ সরকার, স্বাধীনতার পর টি সি বি-তে কর্মরত)। তার সামনে এক ভদ্রলোক বসে কথা বলছেন। পাশের টেবিলে আর এক ভদ্রলোক টেবিলে মাথা রেখে চোখ বুঝে পড়ে আছেন। আমাকে দেখেই লতিফ ভাই বললেন, এসে গেছ! তাঁর কথাতে মনে হল আমি যে আসব তিনি জানতেন। অথচ তাঁর সাথে আমার দেখা নেই গত কয়েক বছর। সামনের ভদ্রলোকের সাথে পরিচয় করিয়ে দিলেন, মেজর বাহার। পাশের টেবিলে যিনি ঘুমাচ্ছেন তার দিকে আঙ্গুল দিয়ে জিজ্ঞেস করলাম, ইনি?

ইনি আব্দুল কুদ্দুস মাখন। দুদিন ঘুম নেই। এই কতক্ষণ আগে এসে পৌঁছেছে।

জিজ্ঞেস করলাম এখন আমাদের করণীয় কি? আমার সাথে এখন দুজন এসেছে, তারা যুগ্মে যেতে চায়। আমাদের এলাকার আরও লোকজন আছে, তাদের কি বলব?

একটু অপেক্ষা কর। এখনও কোন সিদ্ধান্ত হয়নি আমরা কিভাবে কি করব। আজ রাতের মধ্যেই সিদ্ধান্ত হয়ে যাবে। যারা এসেছে তাদের নাম ধাম লিখে রাখ। আমাদের এখনও কোন খাতাপত্র নেই। তুমি রাস্তার পাশে একটা দোকান আছে সেখান থেকে একটা খাতা নিয়ে এস এবং তাদের নাম লিখে নাও।

আমি দু রুপি দিয়ে একটা খাতা কিনে আনলাম এবং নামগুলি লিখলাম। প্রথম নামটা আমার দুলাভাই আব্দুর রহমান, গ্রাম লবখা, কসবা, বাংলাদেশ। এই প্রথম খাতা যা দিয়ে শুরু হয় মুক্তিযোদ্ধার নামের একটা তালিকা। করার মত কাজ আর এমন কিছুই নেই তখন।

সন্ধ্যার দিকে বাড়ীর পথে রওয়ানা দিলাম। লতিফ ভাই জিজ্ঞেস করলেন, এখন কোথায় যাবে? থাকার জায়গা আছে?

না, এখানে থাকার জায়গা নেই। বাড়ীতেই চলে যাব।

মানে? তোমার বাড়ী কোথায়?

এই তো এখান থেকে ঘন্টা দুয়েক লাগে। একদম বর্ডারে।

তাহলে তো ভালই হল। বাড়ী থেকেই আসতে পারবে। কিন্তু কদিন পারবে সেটা হল কথা।

দেখা যাক, যতদিন পারা যায় ততদিন চলবে।

লতিফ ভাইর সাথে পরিচয় ঢাকা মিটফোর্ডে থাকা কালে। আমি কিছুদিন মামার বাসায় ছিলাম। লতিফ ভাই মামার দোকানে টেলিফোন করতে আসত। সেই থেকে পরিচয়। তখন তিনি এম এ পড়েন আর পাড়ায় নেতাগিরি করেন। সে ১৯৬৫ সালের কথা। মামার সাথে ভাল সম্পর্ক ছিল বলে আমাকে খুব স্নেহ করতেন। পরে শুনেছি তিনি আওয়ামীলীগের একজন নেতা। মাঝে মাঝে দেখা হত। অনেকদিন পর আজ আবার দেখা হল।

শেখের কোটের বাজার থেকে পায়ে হেটে বাড়ী পৌঁছতে এক ঘন্টার বেশি সময় লাগল। বুঝতে পারলাম বাড়ী থেকে আগরতলা পৌঁছতে লাগবে দু ঘন্টার একটু বেশি। কাজেই লতিফ ভাইর মত হোটেলেরে না থাকলেও চলবে।

এখন প্রতিদিন সকালে যাই রাতে ফিরি। প্রথমত করার মত এমন কিছুই ছিল না। দুএকদিনের মধ্যেই শুরু হল জনস্রোত। নদীর স্রোতের মত মানুষ আসছে। যে যেভাবে পারে কোন রকমে বর্ডার পেরিয়ে এসে পৌঁছল ইন্ডিয়ান মাটিতে। যেন তারা জানত এই মহাবিপদের দিনে ইন্ডিয়ান মাটিতে পৌঁছতে পারলেই বেঁচে যাবে। শিশু মহিলা যুবক যুবতি বৃদ্ধ বৃদ্ধা মিলে নিঃশ্ব হাতে আশ্রয় নিল খোলা মাঠে। ইন্ডিয়ান সরকার প্রমাদ গনল। রাতারাতি শত শত শরণার্থী শিবির তৈরি হল। এই লক্ষ লক্ষ শরণার্থীর থাকা খাওয়া চিকিৎসার ব্যবস্থা করতে হবে। ইন্ডিয়ান অবস্থা তেমন নয় যে এই শরণার্থীর ব্যয়ভার বহন করে। তাই বিশ্বের কাছে সাহায্য প্রার্থনা করে যথেষ্ট সারা পাওয়া গেল।

এক সপ্তাহের মধ্যেই তৈরি হল হাজার হাজার শরণার্থী শিবির। ইন্ডিয়া বর্ডারের একটু ভেতরে সমস্ত বর্ডারব্যাপী লক্ষ লক্ষ শরণার্থীর মাথা গেজার ঠাঁই হল। রেশন পদ্মতি চালু হল।

লক্ষ লক্ষ মানুষের হাজার হাজার শরণার্থী শিবিরে কিছুদিনের মধ্যেই শুরু হল রোগের প্রাদুর্ভাব। ডায়রিয়া, গুটি বসন্ত ইত্যাদি রোগে অনেকেই আক্রান্ত হতে লাগল। কিন্তু পরিমানে চিকিৎসার ব্যবস্থা ছিল না। ব্যক্তিগতভাবে যে যেভাবে পারে চিকিৎসার ব্যবস্থা করেছে।

মুক্তিবাহিনীতে যারা যোগ দিচ্ছে আগরতলা থেকে তাদের পাঠিয়ে দেয়া হচ্ছে মেলাঘর বা অন্যান্য ট্রেনিং সেন্টারে। চলল যুদ্ধের প্রশিক্ষণ। ভাইপো ফজলু চলে গেল করিমগঞ্জ। আমার অনুজ রিয়াজ তখন তের বছরের বালক। সে গেল ভর্তি হতে। আমি তাকে ধমক দিয়ে বাড়ী পাঠিয়ে দিলাম। এত ছোট বাচ্চা যুদ্ধে যাবে কি করে। সেদিন সে বাড়ী গেল ঠিকই। কিন্তু পরের দিন সে চলে গেল নুরুর কাছে। যুদ্ধ শুরু হবার সাথে নুরু যোগ দিল মুক্তি বাহিনীতে এবং মেলাঘরে ইন্ডিয়ান আর্মির সাথে কর্মরত ছিল।

রিয়াজ নুরুর কাছে গিয়ে বলল, ভাইয়া আমাকে পাঠিয়েছে আপনার কাছে। আমি যুদ্ধে যাব সে ব্যবস্থা করতে বলেছে। নুরু বলল, তোমাকে নেয়া যাবে না। এত ছোট বাচ্চা নেবার চিন্তা এখনও করিনি। এখনও যথেষ্ট পরিমানে উপযুক্ত লোক যুদ্ধে যাবার জন্য প্রস্তুত। সেগুলো শেষ হলে এবং উপযুক্ত না পাওয়া গেলে তোমাকে নেবার চিন্তা করা যাবে। অনেক আকুতি মিনতির পর নুরু রাজী হল। তবে সে রিয়াজকে খুব আগলে রেখেও শেষ রক্ষা হলনা।

কসবার মন্দবাগে জুলাইর শেষে এক সম্মুখ যুদ্ধে তার হাতে গুলি লেগে গেল। তাকে নিয়ে এল আগরতলায়। ছুটে গেলাম দেখতে। ডাক্তার বলল, ভয়ের কিছু নেই। গুলি হাতের এফুরওফুর হয়ে চলে গেছে। ঘা সারতে যে কয়দিন লাগে। এক মাস পর রিয়াজ আবার ফিরে গেল তার জায়গায় নুরুর সাথে। নুরু পরে হয়ে গেল গোসাই। দু নম্বর সেক্টরে নুরু বলতেই বুঝাত গোসাই। অনেক দিন চুল দাড়ি কাটেনি। তার চেহারা রাজপুত্রের মত।

অনেক সময় কোন কোন মানুষকে লম্বা চুল দাড়ি খুব মানায়। তার চুল দাড়ি দেখে হিন্দুরা মনে করত সে গোসাই। গ্রামে বা বাজারের পথে যেতে অনেক সময় হিন্দুরা তাকে প্রণাম করত। তার অনেক বীরত্বের কাহিনী আছে। সে সব কাহিনী পরে মানুষ ভুলে গেছে। এখন ভুলে গেছে নুরুকেও।

মে মাস পর্যন্ত আমাদের এলাকা ছিল স্বাধীন। জল্লাদবাহিনী এবং রাজাকারযুক্ত। কসবা থেকে আখাউরা পর্যন্ত এবং সি এন্ড বি রোড থেকে ইন্ডিয়ান বর্ডার পর্যন্ত এই বিশাল এলাকা ছিল স্বাধীন। মানুষ মনে করত এখানে জল্লাদবাহিনী আসবে না। তারপরও সবাই প্রস্তুত ছিল কখন কি হয়। মে মাসের শেষের দিকে হঠাৎ একদিন গভীর রাতে আক্রমণ হল এই স্বাধীন এলাকা। নির্বিচারে হত্যা করল যাকে পেয়েছে তাকেই। কত মানুষ মারা গিয়েছিল আজ সব মনে নেই। কিন্তু আপন যারা মারা গেল তাদের কথা ভুলিনি।

রাজনগরের রশিদ ভাই, গানপুরের জমাদ্দার, হানিফ, বাড়াইর আলফাজ, চন্ডিদ্বারের শেখর, লতুয়ামুরার কুন্দুস আরও অনেকে। যারা বেচে রইল তারা কোন রকমে গিয়ে পৌঁছল বর্ডার পেরিয়ে ইন্ডিয়ান মাটিতে। এদের অনেকেই শিরিরের কথা শুনেছে। সেখানে রোগ ব্যাধি তো আছেই, তার চেয়ে ভাবনার কথা হল পর্দা পুষিদা রক্ষা হয় না।

তাই এই মানুষগুলো নিজেরাই বাঁশ ছন দিয়ে নিজেদের মত করে ঘর তৈরি করে নিল। তখন ভারতের মানুষগুলোও যেন বদলে গেল। কার বাঁশ কে নিচ্ছে, কার ছন কোথায় যাচ্ছে কেউ কাউকে জিজ্ঞেস করছে না। এ যেন সকলের এজমাল সম্পত্তি। যার যত লাগে নিচ্ছে। শিবিরে একটা নিয়ম কানুনের ভিতর চলতে হয়, এখানে তারা সেদিক থেকে মুক্ত। শেষ পর্যন্ত দেখা গেল এই পাহাড় জঙ্গল মানুষে গিজ গিজ করছে।

আমার পরিবার আশ্রয় নিল বরচতলের পুর্বাদিকে। একটি ছোট টিলার উপর আরও কয়েকটা পরিবার মিলে নিজেরা তৈরি করল তাদের যার যার কুড়িঘর।

এখন আগরতলার পথ দেড় মাইল কমে গেল। সময় কম লাগে। তারপরও আগরতলায় থাকার ব্যবস্থা করিনি মায়ের কারণে। মা ভয় পেয়ে গেছেন। জল্লাদরা নির্বিচারে যেভাবে গুলাগুলি ছুড়েছে, মানুষ যেভাবে মারা গেছে তা দেখে এবং শুনে তিনি মনে করেন এ রকম ঘটনা আরও হতে পারে। তাই তিনি তার আদরের ধনকে অন্যত্র যেতে দিতে চান না।

গোপিনাথপুরের লোদন ভাই শিবিরে আশ্রয় নিয়েছে। আগরতলার চৌমুহনীতে দেখা। তিনি বললেন, একটা কিছু করতে হবে। কিন্তু কোথায় কি করবেন কার কাছে যেতে হবে কিছুই জানে না। বললাম চলুন আমার সাথে। লতিফ ভাইকে পরিচয় করিয়ে দিয়ে বললাম, তিনি কিছু করতে চান। লতিফ ভাই বললেন, আমি একটু ভেবে নিই। কাল একবার আসুন। দেখি কি দেয়া যায়।

পরের দিন বললেন, হাপানিয়া ইয়থ ক্যাম্পে আপাতত একটা কাজ আছে। সপ্তাহে তিন দিন। জিজ্ঞেস করলাম কাজটা কি? তিনি বললেন পলিটিকেল মোটিভেটর। ছেলেদেরকে মোটিভেট করতে হবে। লোদন ভাই পলিটিকেল মোটিভেটর হিসেবে কাজ করলেন জুলাই পর্যন্ত। তারপর এলেন অফিসে।

আগস্টের মাঝামাঝি একদিন অফিসের সামনে অনেক লোকের ভীড়। কোলাহল শুনে বাইরে তাকিয়ে দেখি একটা ট্রাক দাড়িয়ে আছে। সেখান থেকে নুরু নামছে, তারপর এক এক করে তিনজন পাকিস্তানি আর্মি নামছে। নুরুর সাথে রিয়াজ এবং আরও দুজন মুক্তিযোদ্ধা।

আমি কাছে গিয়ে দেখি একজন আর্মির একটা হাত ডানা থেকে নেই। তার শরীরের অর্ধেকটা রক্তে লাল হয়ে আছে। কোথাও শুকিয়ে গেছে। এ পর্যন্ত দেখার পরই আমার অবস্থা কাহিল। প্রায় মাথাঘুরে পরে যাবার অবস্থা। একটা মানুষের হাত নেই! সে এখনও বেঁচে আছে! একজন মানুষের হাত আর একজন কিভাবে উড়িয়ে দিতে পারে!

পাঠক ক্ষমা করবেন, আমি কত ভীঁরু, আমি অস্ত্র নিয়ে যুদ্ধে যাব! অস্ত্র হাতে নিয়েই কাপতে কাপতে পড়ে যাব। আমি কোন মানুষকে হত্যা বা জখম করতে পারব না। সে শত্রুই হোক আর খুনিই হোক। যাই হোক, খুব শক্তি সঞ্চয় করে দাড়ালাম এবং নুরুর কাছে এসে জিজ্ঞেস করলাম কোথা থেকে ধরলি?

শালদানদীর ব্যাংকার থেকে। দুই ঘন্টা গোলাগুলির পর শালাদের গুলি শেষ। যখন দেখলাম আর গুলির শব্দ আসছেন তখন বুঝলাম তাদের গুলি শেষ। তারপর কাছে গিয়ে গ্রেনেড চার্জ করলাম। গ্রেনেডে তার একটা হাত চলে গেছে। সে এই গ্রুপের কমান্ডার। হাত না গেলে ধরা খুব শক্ত হত। এখানে নিয়ে এসেছি মানুষ দেখুক। দেখলে মানুষের মনে আস্থা বাড়বে। এখনই নিয়ে যাব ইন্ডিয়ান আর্মির অফিস মেলাঘর। যুদ্ধ বন্দি হিসাবে তাদের জমা দিব।

এক কাপ চা আনল কে যেন। চা খেতে খেতে নুরু যার হাত নেই তাকে জিজ্ঞেস করল, এই খানের বাচ্চা, তোকে এখন ছেড়ে দিলে কি করবি?

সে সাথে সাথে উত্তর দিল, লেড়েগা।

নুরু বলল, তোর লেড়েগা বার করি। উঠ, বন্দিদের ট্রাকের পেছনে উঠতে বলল। একে একে সবাই উঠল। দাড়িয়ে রইল যার হাত নেই সে। নুরু জিজ্ঞেস করল, কি হল, উঠছনা কেন?

সে বলল, মায় সিপাহী নিহি হো। পিছে নেহি বইঠেগা।

আরে শালা! এখনও তোর পদমর্যাদা! তোকে মারব না এখন। তুই তো মরেই আছিস, আয় সামনে আয় বলে সামনের একজনকে বলল পেছনে চলে যেতে।

(চলবে)

একান্তরের স্মৃতিকথা এবং তারপর ..

মোল্লা বাহাউদ্দিন

দ্বিতীয় পর্ব

সেপ্টেম্বরের প্রথম দিকে একদিন অফিসের সামনে চেচামেচি হৈ চৈ শুনে বাইরে এসে দেখি নুরু বলছে, তোকে আমি গুলি করি নাই। করলে তোকে কে বাচাবে বেটা চোর কোথাকার। যাকে এ কথাগুলো বলছে তিনি আমাদের ব্রাহ্মনবাড়ীয়ার এম পি আজদু মিয়া। তিনি হাপানিয়া ইয়থ ক্যাম্পের ইন-চার্জ। ইয়থদের থাকা খাওয়ার তদারকি করা তার কাজ। তাকে কেন সে নিয়ে এল বুঝতে পারলাম না। জিজ্ঞেস করলাম, কি হয়েছে রে নুরু?

আরে দেখ, পুলাপানগুলি না খেয়ে কয়েকদিন থেকে চলে যায়। সরকারি টাকা আসে তাদের খাবার জন্য আর সে টাকা সে চুরি করে। গিয়ে দেখ এখন ক্যাম্প অর্ধেক পুলাপান নাই। তার বিচার করার জন্য নিয়ে এসেছি। কি করবি কর।

দেখলাম আজদু মিয়ার সাথে তার বেশ কিছু চেলাও আছে। তারাও কিসব বলছে। আমি তাড়াতাড়ি গিয়ে জহুর ভাইকে বললাম। জহুর ভাই নুরুকে খুব ভালবাসে। তার বীরত্বের কথা তিনি সব সময় বলেন। শুনে তিনি বললেন, পাগলাটা তাহলে একটা ঝামেলা বাধাল! আমি তো জানি সেখানে কি হচ্ছে। ইয়থ ক্যাম্পের বিলগুলি যখন সই করি তখন দেখি সে কতগুলো ইয়থের বিল জমা দেয়। আসলে সেগুলো কাল্পনিক। তবুও সই করতে হয়। এখন তো আমাদের বিচারের সময় নয়। ডাক পাগলটাকে।

নুরু এলে তিনি বললেন, তুই এটা কি করেছিস? নিজেদের মাঝে একটা মারামারি লাগিয়ে দিতে চাস? সে কি করে আমি সব জানি। যারা এসব করে তারা নিজেদের একটা দল হাতে রেখেই করে। তার নিজেরও বেশ কিছু লোক আছে। তার বিচার করতে গেলে দেখবি তার সমর্থকরা অন্যায়ভাবে তার পক্ষ নিবে। নিজেদের মাঝে একটা

মারামারি হবে। এখন বিচারের সময় নয়। আমাদের প্রধান উদ্দেশ্য সফল করতে হবে, তারপর বিচার। জয় করেই বিষ ক্ষয় করতে হবে। যা, তাকে নিয়ে আর কোন কথা বলবি না। আগে যুদ্ধ জয় কর, তারপর সব বিচার হবে। নুরু সুবোধ ছেলের মত বেরিয়ে গেল। দরজার বাইরে গিয়ে আজদু মিয়াকে বলল, আজ তোরে ছেড়ে দিলাম শুধু দেশের স্বার্থে। তবে আমি তোকে ছাড়ব না। বলে সে চলে গেল। লোদন ভাই তখন জহুর ভাইকে জিজ্ঞেস করল, জহুর ভাই, আমরা এখন দুর্নীতির কোন্ পর্যায়ে আছি?

জহুর ভাই বললেন, আগে তো আমাদের আঞ্জুলটা দেখা যেত, এখন আঞ্জুলটাও ডুবে গেছে।

নুরু চলে গেলে আজদু মিয়া তার চেলাদের উদ্দেশ্যে ছোটখাটো একটা বক্তব্য রাখল এবং বলল, দেখলে তো তোমরা। সে ভুল বুঝে ভুল করে আমার সাথে এই ব্যবহারটা করল। যাও, তোমরা যার যার কাজে যাও।

ইয়থ ক্যাম্পের শুরুতেই আজদু মিয়া এই ক্যাম্পের ইনচার্জ। আমরা কেউ কোনদিন খেয়াল করিনি বা আমাদের খেয়াল করারও কথা নয়, সেখানে কি হচ্ছে। ইয়থ ক্যাম্পে যারা যুদ্ধে যাবে, এখনও ব্যবস্থা হয়নি তারাই ইয়থ ক্যাম্পে থাকে। তাদের থাকা খাওয়ার সব ব্যবস্থা করার জন্য আজদু মিয়া আছে। টাকা আসে ইন্ডিয়ান সরকারের কাছ থেকে। মাথাপিছু একটা নির্দিষ্ট অংক দেয়া হয় যা দিয়ে একজন মানুষের প্রয়োজনীয় খাদ্য সরবরাহ করা যায়। বাংলাদেশ সরকারের ক্ষমতাপ্রাপ্ত জনাব জহুর আহাম্মদ চৌধুরির অনুমোদন নিয়ে এইসব বিল প্রদান করা হয়।

হাপানিয়া ইয়থ ক্যাম্পের বিল কবে থেকে কি হচ্ছিল তা আমাদের জানার কথা নয়। কিন্তু জহুর ভাই সব জানেন। শুরুতে প্রায় তিন হাজার ইয়থ ছিল ক্যাম্পে। প্রয়োজনীয় খাবার না পেয়ে ছেলেরা চলে গেছে যার যার পথে। কেউ গেছে শরণার্থী শিবিরে, কেউ গেছে নিজেদের পরিবার বা আত্মীয়স্বজনের কাছে। দেখা গেছে কোন কোন সময় ইয়থের সংখ্যা কয়েক শ' তে চলে এসেছে। ইয়থ কমে যাবার অনুপাতে খরচও সেই অনুপাতে থাকা উচিত। কিন্তু আজদু মিয়ার বিল আর কম হয় না। বরং মাঝে মাঝে বেশি দেখানো হয়। লোদন ভাই যখন সেখানে যেতেন তখনও দেখতেন কয়েক শ' ছেলে আছে। কিন্তু আজদু মিয়ার বিল তিন হাজার বা তার বেশি। এভাবে সে প্রতি মাসে লক্ষ লক্ষ টাকা গায়েব করেছে।

সেই সময় বেশিরভাগ নেতারা হোটেলে থাকতেন না। তারা তাদের পরিবার পরিজন নিয়ে বাড়ী ভাড়া করে থাকতেন অনেক শান শৌকতে। তাদের কোন কিছুর অভাব ছিল না। দেশ যদি আরও পঞ্চাশ বছরেও স্বাধীন না হয় তাতে তাদের চিন্তার কোন কারন নেই। অনেকে এমন কামনাও করত। এখানে তারা মন্ত্রির চেয়েও বেশি সুযোগ সুবিধা পাচ্ছে। দেশ স্বাধীন হলে তারা হয়ত বাংলাদেশে এমন সুযোগ নাও পেতে পারে। তাই তারা এখানে যে যেভাবে পারে পয়সা বানিয়ে নিচ্ছে। স্বাধীনতা তাদের কাছে গোঁণ। তাদের খাওয়া দাওয়া বাজার সদাই চালচলন দেখলে মনে করার কোন উপায় ছিলনা তারা ভিন দেশে শরণার্থী, স্বল্পকালের জন্য। তারা রিলিফ খাচ্ছে, রিলিফের টাকা মারছে, যার রেশ স্বাধীনতার পর বাংলাদেশেও চালু হল। এখনও চলছে। চলবে।

অক্টোবরের একদিন বাসাবোর আলাউদ্দিন (যার নামে এখন বাসাবো কলেজ) তার তিন সঞ্জি নিয়ে অফিসে এল। সে এতদিন কোথায় কোথায় ছিল তার একটা ফিরিস্তি দিয়ে বলল, সে চলে যাবে বাংলাদেশে এবং তার নিজের বাড়ী বাসাবোতে। সে বাসাবো আওয়ামীলীগের সেক্রেটারি। দশ বছর যাবত বিএ পরিষ্কা দিচ্ছে। লেখা পড়া বাদ দিয়ে সমাজ সেবায় নিয়োজিত থাকে। যে কোন কাজে যে কেউ ডাক দিলে সে হাজির। আলাউদ্দিনকে চিনে না বাসাবোতে এমন মানুষ নেই। বিশেষ করে বাসাবোর রিফিউজি কলোনির বিহারিরা। তার কথাবার্তায় মনে হল সে হতাশ হয়ে গেছে। এখানে তাকে কেউ কোন দাম দিচ্ছে না। সে চায় সব সময় ব্যস্ত থাকতে। কিন্তু তা পারছে না। আর এখানকার কাজকর্ম দেখে সে স্থির করেছে ফিরে যাবে বাড়ীতে।

তাকে অনেক বুঝাতে চেষ্টা করলাম। বললাম, এ সময় তুই বাড়ীতে গেলে বাসাবোর সব বিহারিরা তোকে ছাড়বে না। ওরা এখন সবাই রাজাকার। তোকে ভাল করে চিনে। তোর কষ্ট হচ্ছে জানি, সবাই তো এখানে কষ্ট করছে। সে তখন রেগে উঠল। বলল, কোথায় কষ্ট করছে? ওরা তো সবাই খুব ভাল আছে। কই নেতারা তো কোন কষ্ট করছে না! তাদের ছেলে মেয়েরা কেউ তো যুদ্ধে যায়নি! দেখলে মনে হয় তারা এখানে আরাম করতেই এসেছে।

যুদ্ধ করছে অশিক্ষিত মানুষ। দেশপ্রেমিক যারা তারাই যুদ্ধ করছে, মরছে। আমাদের কোন নেতা বা তার সম্মান কেউ তো কোথায়ও আহত হতে শুনিনি। এসব দেখলে আমার সহ্য হয় না। আমার শরীরটা যদি যুদ্ধে যাবার উপযুক্ত হত তাহলে আমি সবার আগে অস্ত্র নিতাম। বলা বাহুল্য, আলাউদ্দিন এত মোটা যে সে নড়াচড়া করতে পারে না।

কোন যুক্তিই সে মানল না। চলে গেল বাংলাদেশে।

দেশে গিয়ে কোথায় কোথায় ছিল তা কিছুই জানি না। স্বাধীনতার পর মানুষের কাছে শুনলাম ১৪ই ডিসেম্বরে আলাউদ্দিনকে ধরে নিয়ে যায় রিফিউজি কলোনির রাজাকারেরা। বাসাবো এবং মাদারটেকের রাস্তায় তার দেহটা পড়েছিল দুদিন। তার চোখ দুটি তোলে নিয়ে গেছে। হাত পা ভাঙা, দেহে কোন কাপড় ছিল না। কেউ কেউ বলে দুদিন পর্যন্ত সে জীবিত ছিল। ভয়ে কেউ তার কোন সাহায্য করেনি। এখন তার নামে বাসাবো কলেজ হয়েছে।

অনেক প্রতিশ্রুতির পর সেই দিনটি এল। ১৬ই ডিসেম্বর। নিয়াজি আত্মসমর্পন করেছে। নিয়াজির আত্মসমর্পনের পেছনে যার বেশি দান তার কথা এখন আর কেউ বলে না। সেই বঙ্গাবীর কাদের সিদ্দিকী এখন অবহেলিত। স্বাধীনতা যুদ্ধে তাঁর দান অপরিমিত। বঙ্গবন্ধু সপরিবারে হত্যার পর একমাত্র কাদের সিদ্দিকীই প্রতিবাদ করেছিলেন। আর কেউ নয়। তাঁর অবদানের কথা বিশদভাবে লিখেছেন ডাঃ নূরুন নবী তার বই “স্বাধীনতা আমি দেখেছি”।

নিয়াজি আত্মসমর্পন করেছে। আমরা স্বাধীনতা পেয়েছি। এবার ফিরে যাবার পালা। আকাশে বাতাসে আনন্দের ঢেউ। মানুষ তাদের নিজগৃহে ফিরে যাবে, কর্মজীবীরা তাদের কাজে, আর নেতারা ফিরে যাবেন নেতাগিরি করতে। ক্ষমতা ভাগভাগি করতে। কার আগে কে যাবেন সেই প্রতিযোগিতা। ভারতের শরণার্থী শিবিরগুলো খুব ব্যস্ত, ছেড়ে দেবার কাজে। যার যা কিছু আছে তাই নিয়ে ফিরে যাচ্ছে নিজের ঠিকানায়।

১৭ই ডিসেম্বর সকালে ভাবছি কি করব। লোদন ভাই বলল, চল অফিসে একবার যাই। আমাদের কোন আদেশ দেয়া হয় নাই এখন কি করব। অফিসে গেলে হয়ত তা কিছু একটা জানা যাবে। তাহলে চলুন, দেখি এখন আমাদের উপর কি আদেশ হয়।

সকাল এগারটার দিকে অফিসে পৌঁছলাম। দেখি কেউ নেই। এখন কি করব! দুজনে একটা চায়ের দোকানে গিয়ে চায়ের অর্ডার দিলাম। আরও দু'একজন ছিল সেখানে। বাংলাদেশের কয়েকজন। একজন বলল, আজ সকালেই সব নেতারা চলে গেছে ঢাকায়। হেলিকপ্টারে। আপনারা চলে যাননা কেন?

তাইত! আমরা বোকার মত এখানে এসেছি কেন? লোদন ভাই, আমাদের এখানে আসা উচিত হয় নাই। এখন যে আগে ঢাকা যাবে সেই ক্ষমতার ভাগ পাবে। আমরা কিছুই না।

লোদন ভাই বললেন, আমাদের অবস্থাটা এমন হয়েছে যে, আমি কার খালুরে? আমরা এখন কোথায় তা তো নিজেরাই জানি না। চল ফিরে যাই।

রাস্তাঘাটে মানুষের কাফেলা। যার যা কিছু আছে তা নিয়ে ফিরে যাচ্ছে। একদিন এমনি ভাবে এসে আশ্রয় নিয়েছিল বর্ডার পেরিয়ে ভারতের মাটিতে। এখন ফিরে যাচ্ছে নিজেদের মাটিতে, স্বাধীন দেশে।

আমরা ফিরে এলাম যার যার বাড়ীতে। সেখান থেকেই নেতাদের সাথে শুরু হল মুক্তিযোদ্ধাদের দুরত্ব।

চারদিকে ধ্বংসের চিহ্ন। সবকিছু বিধ্বস্ত। মানুষ তাদের ঘরবাড়ী গুঁড়িয়ে নিচ্ছে। শরণার্থী শিবিরে খাবার মিলত, এখানে এই ধ্বংসের মাঝে কি মিলবে কেউ জানে না। তারপরও মানুষ খুঁশি। তারা নিজেদের ঘরে ফিরেছে।

পরের দিন ১৭ই ডিসেম্বর আমি আর লোদন ভাই রওয়ানা দিলাম ঢাকার পথে। কিভাবে যাব তা কিছুই জানি না। তিনলাখপীরের মোড়ে সি এন্ড বি সড়কের পুলের কাছে এসে দাড়ালাম। যুদ্ধের নয়মাস ব্রাহ্মনবাড়িয়া থেকে কোম্পানীগঞ্জ পর্যন্ত একমাত্র পথ ছিল এই তিনলাখপীরের পুল যার নীচে দিয়ে মুক্তিবাহিনী বা সাধারণ মানুষ পাড়াপাড় হত। দেখি দুএকটা বাস চলে। কিন্তু মানুষের এমন ভীড় উপরে নীচে সমান। কলার গাধির মত দরজায় ঝুলে আছে মানুষ। কয়েকটা বাস চলে গেল। আমরা সাহস করতে পারলাম না। ঘন্টাখানেক চলে গেল। ভাবছি কি করব। লোদন ভাই বললেন, মনে হয় এভাবে উঠতে পারব না। তাহলে কি করবেন?

অন্য কিছু চিন্তা করতে হবে।

কি রকম?

বাসের ড্রাইভারকে বলতে হবে আমাদের উঠার ব্যবস্থা করার জন্য। আমরা আমাদের পরিচয় দিতে হবে। কারণ আমাদের হাতে তো অস্ত্র নেই।

খুব ভাল চিন্তা। চলুন তাই করি। পরের বাস আসুক।

পরের বাসে ড্রাইভারকে বলতে হল না। বাসের ভিতর থেকে একজন চিৎকার করে বলছে, এই ড্রাইভার বাস রাখ। এই কভাস্টার! নামাও এসব সামনের লোকগুলো। দুটা সিট খালি কর। ওনাদের বসার ব্যবস্থা কর। ডাক দিল, বাহার ভাই, উঠে আসুন। কে ডাকল ভীড়ের মাঝে মুখ দেখা যাচ্ছে না। দেখলাম উঠার পথ হয়েছে। ভেতরে যেতেই জাকির জিজ্ঞেস করল, কতক্ষন দাড়িয়ে আছেন? অবস্থা যা দুদিন দাড়িয়ে থাকলেও আপনারা বাসে উঠতে পারবেন না। বসুন। ঢাকা যাবেন তো? তাহলে ভৈরব পর্যন্ত বাসে যাবেন। তারপর ট্রেন। বাসও যাবে ভৈরব থেকে ট্রেনে গেলে সময় কম লাগবে। দেখলাম তার সাথে আরও দুজন সহযোগী।

জাকিরের হাতে একটা এলএমজি। এটাই যেন কথা বলছে। সে যা বলছে তাই হচ্ছে। জাকির লতিফ ভাইর দূরসম্পর্কের আত্মীয়। শুরুতে কয়েকদিন সে অফিসেই ছিল। টুকটাক কাজ করেছে। পরে চলে যায় ট্রেনিং। তারপর আর দেখা নেই।

জিজ্ঞেস করলাম এতদিন তোমাকে দেখিনাই। কোথায় যুদ্ধ করেছে?

আমরা তো ভিতরে থেকেই যুদ্ধ করেছি। আমার এলাকা ছিল কুটি বাজার থেকে কোম্পানীগঞ্জ। ট্রেনিংশেষে কিছুদিন ছিলাম ইয়াকুবের গ্রুপে। তারপর চলে আসি ভিতরে।

সামনের পুলটা ভাঙা। সবাইকে নামতে হবে। দেখলাম ভাঙা পুলের ইট সুড়কি দিয়ে রাস্তা হয়েছে কোন রকমে একটা গাড়ি যেতে পারে এমনভাবে। সেতু ভেঙেছে আমাদের মুক্তিবাহিনী। জল্লাদ বাহিনীর চলাচলে বাধা দেবার জন্য। পাক বাহিনীর চলাচলের জন্য তারা নিজেরাই এই রাস্তা জোড়াতালি দিয়েছে। এখন আমরা ব্যবহার করছি নিজেদের প্রয়োজনে। আমাদের প্রয়োজনে আমরা ভেঙেছি, এখন আমাদের প্রয়োজনে আমরাই গড়ব। এসব ভাঙা পুলের পুলছেরাত পাড়ি দিয়ে পৌঁছলাম সবচেয়ে বড় সেতু ভৈরবের সেতু।

এই সেতুটা জোড়াতালি দিয়ে গাড়ী পারাপারের ব্যবস্থা করা যায়নি। নদীর এপার থেকে ওপার বহুদূর। খরস্রোতা। তাই এখানে ফেরির ব্যবস্থা করা হয়েছে। এই তো দুদিন আগেও ছিল এই ফেরি জল্লাদবাহিনীর দখলে, আজ সাধারণ মানুষের হাতে। বাস, ট্রাক, কিছু গাড়ী লাইন ধরে আছে। সবাই ঢাকা যাবে। ফেরির ধারণক্ষমতা সীমিত। সেই লাইনে দাড়িয়ে বেলা তিনটার দিকে আমাদের বাস পৌঁছল ভৈরব রেল স্টেশনের কাছে। বাসের কভাস্টার আমাদের কাছে ভাড়ার জন্য আসেনি। জাকির বলল, ভাড়া লাগবে না। আমি কভাস্টারকে বলেছি। এখন ঠিক করুন বাসে যাবেন নাকি রেল যাবেন। আমরা এখানে নেমে যাব। কিছু কাজ আছে। তারপর কখন যাব ঠিক নেই।

বললাম, ট্রেনেই যাব। অন্তত মানুষের ধাক্কাধাক্কি কম হবে।

ঠিক আছে, সেভাবেই যান। আবার দেখা হবে বলে ওরা চলে গেল।

আমরা দুজনে ভৈরব প্লাটফরমে ঢুকলাম। দেখি টিকেট কাউন্টার খোলা আছে। তবে কোন মানুষ নেই। আমরা অনেকক্ষন পায়চারি করলাম। গাড়ী আসার কোন লক্ষন নেই। স্টেশন মাষ্টারের ঘরের দিকে গেলাম। তিনি আছেন। লোডন ভাই জিজ্ঞেস করল, ট্রেন কখন আসবে বলতে পারেন?

তিনি মুখ না তোলেই বললেন এর সঠিক উত্তর আমি দিতে পারব না। ট্রেন শুধু ভৈরব-ঢাকা আসাযাওয়া করে। কখন আসবে ঠিক বলতে পারব না। তবে কালিগঞ্জ আসলেই আমরা খবর পাই এবং টিকেট দেয়া শুরু করি।

শেষ পর্যন্ত ট্রেন এল সাতটায়। অনেক ভীড়। তারপরও উঠতে খুব অসুবিধা হল না। যাক একটু আরামেই যাওয়া যাবে। ঘোড়াশাল গাড়ী থামার পর দেখি অন্য রকম দৃশ্য। মানুষ আর মানুষ। এত মানুষ কোথায় উঠবে! হৈ চৈ কন্ঠ ট্রেনের উপরে নীচে মিলে জায়গা হয়ে গেল। মানুষ গিজ গিজ করছে। শ্বাস ফেলতে পারছি না।

কালিগঞ্জ ট্রেন থামার সাথে সাথে বস্তা উঠতে লাগল, জানালা দিয়ে। কার উপর পড়ছে তা দেখার দায়িত্ব যে ফেলছে তার নয়। যে ট্রেনের ভিতর আছে গা বাচানো তার নিজের দায়িত্ব। উপরে নীচে কোথাও তিল ধারনের স্থান নেই। প্রতিটি দরজায় মানুষ ঝুলছে। ঢাকার কাছাকাছি আসতেই বার বার ট্রেন থামছে। তখন মনে পড়ল ২৩শে ডিসেম্বরের শেষ ট্রেনটার কথা।

লোডন ভাই নেমে গেল তেজগাঁ স্টেশনে। তিনি চাকরি করেন তেজগাঁ রবার ইন্ডাস্ট্রিতে। ম্যানেজার। নামার সময় বলে গেলেন কাল পরশু চলে আসিস আমার এখানে।

রাত নয়টায় এসে নামলাম কমলাপুর স্টেশনে। হাতে এমন কিছুই নেই। বাসাবো যেতে হলে রেল লাইন ধরে গেলে পনের বিশ মিনিট। ঠিক করলাম হেটেই যাব।

যেতে যেতে ভাবছি বন্ধুবান্ধব কে কোথায় আছে কে জানে! কে বেঁচে আছে কে মরেছে কিছুই তো জানি না।

থাকতাম মধ্য বাসাবোর 'ছাত্রনীড়' মেসে। মেস আছে কিন তাও জানি না। বাসাবোর প্রতিটি বাড়ীই আমার খুব চেনা। মেস না থাকলে যে কোন বাড়ীতে উঠে পড়ব। কিন্তু উঠতে হল না। দেখি মেস ঠিক যেমন ছিল তেমন আছে। আমাদের কাজের ছেলেটা আমাকে দেখেই দৌড়ে এল। আজ পাঁচ বছর যাবত সে এই মেসে কাজ করে। বাজার করা থেকে রান্নাবান্না সব। তাকে দেখে আমারও মনে হল সে বুঝি আমার পরিবারের কোন আপনজন।

খবর পেয়ে সাদেক, জাহাঞ্জির, মিজান আরও অনেকে এল। জানলাম আমাদের বন্ধমহলে শুধু আলাউদ্দিন ছাড়া আর সবাই ভাল আছে।

পরের দিন অফিসে পৌঁছার পরই একটা ছুটাছুটি হৈ হৈ পড়ে গেল। সব সহকর্মী-বন্ধুরা ছুটে এল। বুকে নিয়ে কোলাকুলি, এক সময় বডি বিল্ডার রেজাউল তো মাথায় উঠিয়ে ফেলল। সবাই মিলে একটা ছোটখাটো আয়োজন করেছে আমাকে আপ্যায়ন করার জন্য। সেখানে বড় বড় বসও ছিলেন। তাদের অনেকেই হয়ত প্রশ্নের সম্মুখীন হবেন এই ভয়ে আছেন।

আপ্যায়নশেষে শুরু হল এই নয় মাসের গল্প। অফিসের গল্প। ১৬ তারিখের পর কোন বিহারি অফিসে আসেনি। কলনিতে যারা থাকত রাতারাতি উদাও হয়ে গেছে। অফিসের কে কে মারা গেল, তার মাঝে আমাদের সকলের প্রিয় ব্যাংকের লেডি ডাক্তার পাক বাহিনীর হাতে খুন হয়েছেন। যারা মারা গেছে তারা সবাই অফিসের বাইরে পথে অথবা বাড়ীতে মারা গেছেন। ব্যাংকের লাইব্রেরিয়ান আসাফউদ্দৌলা আমার নাম শুনে আজ থেকে পলাতক। তার বাড়ীতে গিয়েও তাকে পাওয়া যায়নি। বাড়ী খালি। তিনি আমার শিক্ষক। যুষ্টির সময় এবং তার আগে তার

কথাবার্তায় সবাই ক্ষেপা। আমি আসলেই তাকে ধরা হবে। কিন্তু অফিসে না আসায় কয়েকজন তার বাসায় গিয়ে ধরতে পারেনি।

রেজাউল বলল, আমার কাছে একটা লিফ্ট আছে। তাতে তুই প্রথম হয়েছিস।

কিসের লিফ্ট? আমি জিজ্ঞেস করলাম।

ইউনিয়নের সভাপতি লতিফ বলল, মানুষ মারার লিফ্ট। গভর্নরের পিএ বিহারি ইসহাকের ডায়ার থেকে এই লিফ্টটা পেয়েছি। সে তো সব সময় আর্মির বড় বড় অফিসারদের সাথে যোগাযোগ রাখত। সে এই লিফ্টা তৈরি করেছিল। এতে সাত জনের নাম আছে। তার মধ্যে তোর নামটা এক নম্বরে। তোরে একবার পাইলেই হইছিল। তার অনেক ক্ষমতা ছিল। দেখিস না রাতারাতি সব বিহারিদেরকে কিভাবে সরিয়ে নিরাপদ স্থানে নিয়ে গেল।

তারপর আরও গল্প চলল। সেদিন অর্ধেক দিন অফিস হয়নি। সব শেষে আমি বললাম, এবার আমরা সকলে ঐক্যবন্ধ হয়ে বিশ্বস্থ দেশটাকে গড়তে হবে। কাজ করতে হবে দ্বিগুন।

- 0 -

দেশ শত্রুমুক্ত হয়েছে, আমরা স্বাধীন। স্বাধীনতার স্বাদ ঘরে ঘরে পৌঁছে দিতে হবে। আমরা গ্রহন করব। দেখা গেল স্বাদ পৌঁছে দিতে হয়নি। কারও কারও ঘরে পৌঁছে গেছে। যার তার হাতে এখন অস্ত্র। রাজধানীতে অগ্নিত মুক্তিযোদ্ধা। পাড়ার ছেলে যারা ঢাকার বাইরে যায়নি তাদের হাতে আগ্নেয়াস্ত্র। তারাও মুক্তিযোদ্ধা। ১৬ই ডিসেম্বরে পাক বাহিনী আত্মসমর্পনের পর রাজাকার আলবদর তাদের অস্ত্র রাস্তায় ফেলে দিয়ে সাধারণ মানুষের সাথে মিশে গেছে। আর এই সুযোগে যে যা পেয়েছে কুড়িয়ে নিয়ে মুক্তিযোদ্ধা হয়ে গেছে। মুক্তিযোদ্ধার চেয়ে তাদের দৌরাত্ন বেশি। ১৬ই ডিসেম্বর বা তার পর যারা অস্ত্র কুড়িয়ে মুক্তিযোদ্ধা দাবী করে তাদের বলা হয় ১৬ ডিভিশন। এই ১৬ ডিভিশন রাজনৈতিক নেতাদের সাথে সুসম্পর্ক বজায় রেখে অপরাধ করে যাচ্ছে। মুক্তিযোদ্ধার নামে কলঙ্ক ছড়িয়ে দিচ্ছে। রাজনৈতিক নেতা, পাতি নেতারাও নিজেদের স্বার্থে এই ডিভিশনকে ব্যবহার করছে। যেখানে সেখানে দোকান পাট জায়গা জমি দখল করছে। সকলেই আরো সুযোগের সন্ধানে আছে।

আমার প্রথম কাজ হল আদরের ছোট ভাই রিয়াজকে মুক্তিবাহিনী থেকে এনে স্কুলে ভর্তি করা। আমার ইচ্ছা তাকে লেখাপড়া করা। লেখাপড়া করে সে অনেক নাম করবে। রিয়াজ তখন মিরপুর মুক্তিবাহিনী কেম্পে কেপ্টেন হারুনুর সাথে। (এই কেপ্টেন হারুনুর রশিদ পরবর্তিতে লে: জেনারেল এবং সেনা প্রধান হিসেবে অবসর নেন।) সেদিন অফিস থেকে বের হয়ে সোজা চলে গেলাম মুক্তিবাহিনী কেম্পে। কেপ্টেন হারুন আমাকে দেখেই হেসে উঠলেন। বললেন, ওকে নিতে এসেছ, কিন্তু ওর তো লেখাপড়া হবে না। আমি ওকে তোমার চেয়ে বেশি চিনি। নিয়ে লাভ নেই। বরং এখানেই থাকতে দাও।

তাঁর কথা শুনে মনে অনেকটা দুঃখ পেলাম। মুখে বললাম, ও তো মাত্র তের পেরিয়েছে, লেখাপড়া হবে না কেন? আমার হাতে লেখাপড়া হবে না অমন চিন্তা আসে কি করে?

তুমি জান না, ও তোমাকে ছাড়িয়ে গেছে কোন কোন দিক দিয়ে। আর্মিতে থাকলেই সে ভাল করবে। চিন্তা করে দেখ। এখন তোমার ইচ্ছা।

আমার ইচ্ছা। নিয়ে এলাম রিয়াজকে। ভর্তি করে দিলাম বাসার কাছে খিলগাও হাই স্কুলে।

এখন দেশটা গড়তে হবে। কাজ করতে হবে দ্বিগুন। কে করবে? সবাই স্বাধীনতার স্বাদ চায়, ভাগ চায়। পাকিস্তান থেকে লক্ষ লক্ষ বাঙালি ফেরত এসেছে। যে যে বিভাগে কাজ করত বাংলাদেশে এসে সেই বিভাগে যোগদান করল। তারাও স্বাধীনতার ভাগ চায়। পাকিস্তানে কাজ করে বঞ্চিত হয়েছে পদোন্নতি থেকে, সুযোগ সুবিধা থেকে। এখন দেশ স্বাধীন হয়েছে। সবকিছু পুষিয়ে নিতে চায়। সরকারি বেসরকারি প্রায় প্রতিটি অফিসে চলছে দাবী

আদায়ের অরাজকতা। মানুষের অগনিত দাবী। দাবী আদায়ের জন্য সৃষ্টি হল শত শত সংগঠন। পাকিস্তান থেকে যারা ফেরত এসেছে তাদের বলা হল রিটার্নি। রিটার্নিরা বাংলাদেশে এসে এখানকার কর্মরত কর্মচারীদের সাথে একাত্ম হতে পারেনি। কারন তাদের দাবী অর্থোক্তিক। স্থানীয় কর্মচারিরা মেনে নেয়নি। কর্মচারীদের মাঝে ভাগ হল। একদল স্থানীয় আর এক দল রিটার্নি।

এই রিটার্নিরা শুরু করল ঘেরাও কর্মসূচি। প্রতিষ্ঠানের প্রধানকে ঘেরাও করে দাবী আদায় করা। প্রায় প্রতিটি প্রতিষ্ঠানেই চলল এই ঘেরাও অভিযান। অর্থোক্তিক দাবী আদায়। শত শত ইউনিয়নের জন্ম হল। একা দাবী আদায় করা যায় না। তাই ইউনিয়ন। ইউনিয়নের মাধ্যমে অনেক কিছু করা যায়। অফিসারস ইউনিয়ন থেকে রিক্লাওয়লা পর্যন্ত ইউনিয়ন। এমন কি যারা বাসা থেকে অফিসে লাঞ্চ নিয়ে যায় তারাও এখন ইউনিয়নের মাধ্যমে দর কষাকষি করে দাবী আদায়ে সোচ্চার। চারদিকে শুল্লু দাবী আর দাবী। সবাই স্বাধীনতার ভাগ পেতে চায়, স্বাদ পেতে চায়। কিছুদিনের মধ্যে এইসব দাবী জেলাভিত্তিক দাবীতে রূপান্তরিত হল। কে কোন্ জেলার লোক, সেই জেলার বড় সাহেব কে, বা কতজন। জেলা বড়সাহেবরাও নিজের জেলার মানুষকে স্বাদ পাইয়ে দিতে ব্যস্ত। কোথায় দেশটাকে গড়ে তুলবে তা না করে সবাই যার যার স্বার্থ নিয়ে ছুটাছুটি করছে। মনে হয় সবাই এখন জেলাভিত্তিক স্বাধীনতা চায়।

পাকিস্তানপ্রেমিরা তাদের বোল পাল্টে অনেকে ঘাপটি মেরে আছে। প্রায় প্রতিটি প্রতিষ্ঠানেই ওরা আছে। এই সুযোগটা অনেকেই কাজে লাগাতে ব্যস্ত হয়ে পড়ল। একদিকে কিছু কর্মচারিকে উসকে দেয়, আর অন্যদিকে নিজেদের উদ্দেশ্য সমাধা করার কাজ হাতে নেয়।

বাংলাদেশ ব্যাংকটা দুটা ভাগ হয়ে গেল। প্রথমে শুরু হয়েছিল রিটার্নি নিয়ে। শত শত রিটার্নি এসে ব্যাংকে যোগদান করল এবং তাদের সিনিওরিটি দাবী করল। স্থানীয় কর্মচারিরা তার বিরোধিতা করায় এমন পরিস্থিতির সৃষ্টি হল যেন আমরা আবার পাকিস্তানির সাথে দর কষাকষি করছি। তাদের কাজকর্মে মনে হল তারা যেন বাঙালি নয়, পাকিস্তানি। অনেকের এখনও পাকিস্তানপ্রীতির রেশ কাটেনি। তাদের গায়ে এখনও বিহারী বিহারী গন্ধ। এই রিটার্নিরা সব সময় যুদ্ধংদেহি মনোভাব নিয়ে কাজ করে। তাদের আলাদা ইউনিয়ন গঠন করে দাবী আদায়ের স্মারক পেশ করে। দেখা গেল এই রিটার্নিরা ৯০ ভাগ একটা বিশেষ জেলার মানুষ আর সেই জেলার মানুষ ডিপুটি গভর্নর নুরুল মতিন নিজেও রিটার্নি। সারাজীবনই তিনি করাচীতে কাজ করেছেন। তিনি ব্যাংকিংএ একমাত্র গোল্ড মেডালিস্ট। ডিপুটি গভর্নর হিসেবে নিজ জেলার মানুষকে তিনি খুব ভালবাসেন এবং তাদের অর্থোক্তিক দাবীকে ন্যায় বলে মনে নিতে চেষ্টাও করলেন। কিন্তু ব্যাংকের নিয়ম অনুযায়ী তা হতে পারে না বলে গভর্নর অনুমোদন দেননি।

ফেব্রুয়ারিতে গভর্নর গেলেন আই এম এফ অধিবেশনে তিন মাসের জন্য। তখন নুরুল মতিন সাহেব হলেন গভর্নর-ইন-চার্জ। গভর্নরের সব কাজের দায়িত্ব এখন তার হাতে। দায়িত্ব হাতে পেয়েই তিনি শুরু করলেন তার কাজ। কয়েক সপ্তাহের মধ্যে ঢাকা (হেড অফিস) অফিস থেকে অনেক বড় বড় অফিসার এবং বিভাগীয় প্রধানকে বিভিন্ন জেলায় বদলি করে দিলেন এবং তাঁর নিজের পছন্দের মানুষকে হেড অফিসে নিয়ে এলেন। ব্যাংকের প্রায় সব বিভাগের প্রধান করা হল তাঁর নিজের লোক। দেখা গেল এখন ব্যাংক চলবে সেই জেলার মানুষ দিয়ে। তার নিজের দলকে খুশি করার জন্য রাতারাতি তিরিশটা কাউন্টার খুলে তাদের তিরিশজনকে পদোন্নতি দিলেন। রিটার্নি সবাইকে তিনি সিনিওরিটি দিলেন। তার মানে হল যারা পাকিস্তানে বহুদিন চাকরি করেছেন অথচ তাদের কোন প্রমোশন হয়নি তারা এখন এখানে সিনিওর। একটা পদ খালি হলেই নাম আসবে রিটার্নীদের। আর বাংলাদেশে যারা এতদিন চাকরি করেছে তারা আগামী দুএক বছরের মাঝে পদোন্নতির আশা করতে পারে না। ইউনিয়ন তার প্রতিবাদ করল। রিটার্নি ইউনিয়নও বসে নেই। তারা তাদের কাজ বাদ দিয়ে সারাদিন বসে থাকে গভর্নরের অফিস ঘিরে আর একটার পর একটা কাজ করিয়ে নিচ্ছে। এক পর্যায়ে দেখা গেল কর্মচারির বেতন বন্ধ হয়ে গেছে। নুরুল মতিনের অর্থোক্তিক কাজের প্রতিবাদে ক্যাশ বিভাগ কাজ বন্ধ করে দিয়েছে। এখন আমরা বাংলাদেশের কর্মচারিরা ফরিয়াদ জানাব কার কাছে? যার কাছে ফরিয়াদ করব তিনি নিজেই তো এসব করে

যাচ্ছেন বা করাচ্ছেন। এখন উপায় কি? গভর্নর ফিরে আসা পর্যন্ত বেতন না পেলে মানুষ চলবে কিভাবে? অতএব অপেক্ষা করা যায় না।

আমি আমার সাথে দুজন নিয়ে নুরুল মতিনের চেম্বারে ঢুকলাম। যথাযথ সম্মান প্রদর্শন করে জিজ্ঞেস করলাম, ‘স্যার, অফিসে যে এতসব ব্যামেলা হচ্ছে, কেউ কাজ করছেন, সবাই আপনার অফিসের সামনে বসে থাকে, কর্মচারির বেতন দেয়া হয়নি, ইলেক্ট্রিক বন্ধ করে দিচ্ছে, এসব অনিয়মের কি ব্যবস্থা করছেন?’

তিনি উত্তর দিলেন, ‘আমার করার কিছু নেই’।

কিন্তু আপনি তো অনেক কিছু করছেন, এই যেমন রিটানীদের সিনিওরিটি দিয়েছেন, তিরিশটা কাউন্টার খুলে তাদের প্রমোশন দিয়েছেন, যারা অনেক বছর নিজেরা বাড়ী করে পরিবার পরিজন নিয়ে সুখে সংসার করছে, তাদের ছেলেমেয়ে স্কুল কলেজ ইউনিভার্সিটিতে পড়ছে, হঠাৎ করে তাদের বদলী করে দিয়েছেন, একবারও ভাবলেন না তাদের কোন অসুবিধা হবে কিনা। অথচ এই অনিয়মগুলো ঠিক করার জন্য আপনার করার কিছু নেই। তাহলে আমরা যাব কার কাছে?

গভর্নর সাহেব ফিরে আসুক, তারপর দেখা যাবে।

তাহলে আপনার এখানে প্রয়োজন নেই, আপনি পদত্যাগ করুন, বেরিয়ে যান অফিস থেকে! গভর্নর সাহেব ফিরে আসলেই অফিসে আসবেন।

তিনি এমন একটা প্রস্তাবের জন্য প্রস্তুত ছিলেন না। ভাবাচেকা খেয়ে তাকিয়ে রইলেন।

আপনি গাড়ীও পাবেন না। গভর্নর সাহেব আসলেই গাড়ী পাবেন। আমি ড্রাইভারকে বলে দিয়েছি সে আর আপনার গাড়ী চালাবেনা।

কয়েক সেকেন্ড তিনি ভাবলেন। মাথা নিচু করে উঠে দাড়ােলেন। আশ্বে আশ্বে দরজার বাইরে এসে তাকালেন বিরাট ওয়েটিং রুমের দিকে। তিরিশ চিল্লিশজন লোক বসে আছে। সবাই তার তোষামোদকারি, রিটানী। যেন তাঁর দেহরক্ষি। অফিসের কাজ বাদ দিয়ে এখানে বসে আড্ডা দেয়, তাঁকে দিয়ে কাজ করায়। আমি মতিন সাহেবের পেছনে। আমার এক পকেটে একটা হাত। পেছনে আমার দুজন সাথি। মতিন সাহেব হয়ত তার তোষামোদকারিদের কাছ থেকে কিছু আশা করেছিলেন। সবাই একবার তাকাল। আমার পকেটে হাত দেখে কেউ টু শব্দটি করল না। হলুয়ে দিয়ে মতিন সাহেবকে অফিসের বাইরে নিয়ে বললাম, যান রিক্সা নিয়ে বাসায় যান। আপনাকে শ্রদ্ধা করতে পালামনা, কারন আপনি অন্যায় কাজ করেছেন। শাসক যখন অন্যায় করে তখন তার প্রতিবাদ এমনিভাবেই করতে হয়। আমাদের আর কোন উপায় ছিল না।

তিনি রিক্সা নিয়ে সোজা চলে গেলেন বঙ্গাবন্ধুর কাছে। তিনি বঙ্গাবন্ধুর সহপাঠি তা জানা ছিল না। বুদ্ধিজীবীরা বুদ্ধি খাটিয়েই কথা বলে। বঙ্গাবন্ধুকে কি সব বললেন তিনিই জানেন। বঙ্গাবন্ধু তৎক্ষণাত তাঁর স্পেশাল ব্রাঞ্চকে ডেকে আদেশ দিলেন। মৌখিক। কি আদেশ দিলেন তা তিনিই জানেন আর জানে স্পেশাল ব্রাঞ্চ।

স্পেশাল ব্রাঞ্চ মতিন সাহেবের পিএ-এর সাথে যোগাযোগ করে আমার সব বৃত্তান্ত সংগ্রহ করল। বলা বাহুল্য, মতিন সাহেবের পিএ ও একজন রিটানী এবং একই জেলার মানুষ। তিনি আমার খবরা খবর দেবার সময় কিছু দাড়ি-কমা যোগ বিয়োগ করে, কিছু শব্দ এদিক সেদিক করে যা দিলেন তাতে আমি একজন **সম্ভ্রাসী** ছাড়া কিছুই নই। সেই মতে স্পেশাল ব্রাঞ্চ তাদের অভিযান শুরু করে দিল।

রাতে আমার খোজে সাতটা বাড়ীতে হানা দিল পুলিশ। আমি তখন বাসাবো থাকি। আমার বাসা, পাশের বাসা, আত্মীয়ের বাস, আমার কয়েকজন বন্ধুর বাসা সব মিলে সাতটা বাসায় হানা দিল পুলিশ। আমি তখন **টাঙ্গাইলের** একটি গ্রামে আমার বন্ধু রহমানের বাড়ীতে। ঘটনার পর সবাই বলল, তুই ঢাকার বাইরে চলে যা। কাছেই ছিল

রহমান। সে বলল, আমাদের বাড়ীতে চলে যা। তুই তো চিনিস। দেরি করিস না। সেদিন বিকেলেই চলে গেলাম।

পরের দিন বিকেলে রহমান আসল তার বাড়ীতে। হাতে তিনটা খবরের কাগজ। প্রথম পাতায় লেখা হয়েছে বাংলাদেশ ব্যাংকে সন্ত্রাসীর হামলা, ডিপুটি গভর্নর আহত, কোনটায় লিখেছে বাংলাদেশ ব্যাংকে সন্ত্রাসী কার্যকলাপ, গভর্নর বহিস্কৃত ইত্যাদি। খবর পড়ে হাসলাম। রহমান বলল, কাল এখান থেকে চলে যা অন্য কোথাও। কারন এক জায়গায় বেশিদিন থাকা ঠিক নয়। ধরতে পারলে তো উত্তম মধ্যম কিছু না কিছু জুটবেই। তাই সাবধানে থাকা ভাল।

আমার নামে কোন মামলা নেই। কারন কোন থানায় কোন ডাইরি নেই। যা হয়েছে বঙ্গবন্ধুর মৌখিক আদেশে। এ মামলার রায় শুধু বঙ্গবন্ধুই দিতে পারেন। আমাকে ধরার জন্য আদেশ দিয়েছেন, কিন্তু রায় দেননি।

পরের সপ্তাহে দৈনিক ইত্তেফাকে একটা উপসম্পাদকীয় বের হল। লিখেছেন আবেদ খান। তিনি ব্যাংকে সরজমিনে খোজ খবর নিয়ে এই লেখাটি লিখেছেন। অন্যান্য পত্রিকায় যেসব খবর ছাপা হয়েছে তার প্রতিবাদ অনেকটা। তাঁর লেখায় পরিষ্কার হল যে আমি সন্ত্রাসী নই, একজন মুক্তিযোদ্ধা। তার সাথে তিনি ব্যাংকের অনেক অনিয়মের কথাও তোলে ধরলেন। এই লেখার পর বাতাসটা আমার দিকে ঘুরে গেল। সন্ত্রাসী খেতাবটা কাটা গেল।

২৭ দিন এখানে সেখানে পালিয়ে বেড়ালাম। তারপর তোফায়েল আহাম্মদের সাহায্যে একটা তারিখ ঠিক হল। আমাকে বঙ্গবন্ধুর সামনে যাবার সুযোগ দেয়া হবে।

তোফায়েল ভাই বললেন, দেখ আমি কিন্তু কিছু বলতে পারবনা। আমার কাজ শুধু সামনে যাবার সুযোগ করে দেয়া। বাকি যা করার বা বলার তইই বলবি।

আমি তাতেই রাজি।

রাজি তো হলাম কিন্তু চিন্তায় ঘুম আসে না। আমি বঙ্গবন্ধুর মুখোমুখি দাড়াব! কি বলব! কিভাবে কথা বলব! চোখের দিকে তাকাতে পারব! তিন দিন পরই সেই তারিখ। এই তিন দিন কত রকমের কথা মনে মনে আওড়ালাম। কি প্রশ্ন করবেন? কি উত্তর দিতে হবে? কিভাবে কথা বলতে হবে! শেষ পর্যন্ত ঠিক করলাম সব কথার উত্তর খুব নরম সুরে দিতে হবে। চোখের দিকে তাকানো যাবেনা। হাত পা শক্ত রাখতে হবে। কাঁপতে দেয়া যাবেনা।

সেই অপেক্ষার দিনটি এল। তোফায়েল ভাই এক সময় আমাকে সাথে নিয়ে বঙ্গবন্ধুর চেম্বারে ঢুকে বললেন, এই আপনার আসামী হাজির। একজন মুক্তিযোদ্ধা। তার নিজেরও কিছু কথা আছে, বলতে চায়। বলে বেরিয়ে গেল।

আমি ফাঁসির আসামীর মত মাথা নিচ করে দাঁড়িয়ে আছি। আমি টের পাচ্ছি বাঘের দৃষ্টি আমার দিকে। কয়েক মুহূর্ত। একটা গম্ভীর আওয়াজ ভেসে এল, তুই বুড়া লোকটাকে মারলি কেন?

আমি তো মারিনি! (মনে মনে কতবার নরম সুর মুখস্ত করলাম। কিন্তু বলার সময় আমার সেই চিরাচরিত রুক্ষ স্বরই বেরিয়ে এল।)

আকাশ বাতাস কাঁপিয়ে রয়েল বেঞ্জালের গর্জন – তুই জানিস কার সাথে কথা বলছি?

আমাকে শক্তি সঞ্চয় করতে হবে, সঠিক নরম সুরে উত্তর দিতে হবে! অবশ হয়ে গেলে চলবে না। আমার কথা বলতে হবে! কাপড় ভিজিয়ে দিলে চলবে না। উত্তর একটা এসে গেল। সাহস সঞ্চয় হয়ে গেছে। বলে ফেললাম, আমি বঙ্গবন্ধুর সাথে কথা বলছি, জাতির পিতার সাথে কিভাবে কথা বলতে হয় তা আমি শিখি নাই।

মতিন কি মিথ্যা বলেছে?

তা জানি না। তিনি ইজম করেছেন! তাই অফিসে এত গন্ডগোল।

কী! ইজম করেছে? যা প্রমান নিয়ে আয়!

নিয়ে এসেছি, বলে আমার হাতে এক গাদা ফাইল বাড়িয়ে দিলাম।

এগুলো কি?

তিনি যে ইজম করেছেন তার প্রমান। একটা নয়, কয়েক ডজন। আর আপনি বলেছেন যুদ্ধে আমাদের তিরিশ লক্ষ লোক মারা গেছে। তাহলে আমাদের কাউন্টার বাড়বে না কমবে? তিনি রাতারাতি তার দলকে খুশি করার জন্য তিরিশটা কাউন্টার তৈরি করেছেন। তাতে আমাদের তিরিশ লক্ষ টাকা অপচয় হচ্ছে।

আর একবার গম্ভীর আওয়াজ। তোফায়েল!

তোফায়েল ভাই এসে হাজির।

ও কী বলে?

ও নিজের কথা বলে। আপনি তো তার কথা শুনেননি। এক পক্ষ শুনছেন।

কয়েক মুহূর্ত চুপ। তারপর বললেন, যা আমাকে ইনকোয়ারি করতে দে।

তখন যে এত সাহস কোথা থেকে এল জানি না। বললাম, এখন আমি যাব কোথায়? গেলেই তো এ্যারেস্ট করবে!

এ্যারেস্ট করলে কি হয়? আমি জেল খাটি নাই? যা কয়দিন পালিয়ে থাক গিয়ে। আমাকে ইনকোয়ারি করতে দে।

মাথা নত করে খুশিমনে বেরিয়ে এলাম। এবার সুবিচার পাব।

বেরিয়ে এসে তোফায়েল ভাই বললেন, তোর তো সাহস কম না! কি উত্তর দিবে বলে বলে নাকি কান্না করছিল, কিন্তু কথা বলার সময় তো খুব সাহসের সাথে বলেছিল। যা সাবধানে থাক গিয়ে। ইকোয়ারি শেষ না হওয়া পর্যন্ত লুকিয়ে থাক। পুলিশের হাতে গেলে অনেক ঝামেলা।

পরের দিনই ২৭ জনের একটা টীম বাংলাদেশ ব্যাংকে গেল। প্রথম ইনকোয়ারিতেই নুরুল মতিনকে বদলি করা হল আইডিবি-তে। ব্যাংকে একটা হৈ চৈ পড়ে গেল। অনেক গল্পও তৈরি হল। আমার কত ক্ষমতা! আমি মুজিব বাহিনীর লোক। আমাকে কেউ কিছু করতে পারবে না। ইনস্পেকশন টীমকে আমরা অনেক তথ্য সরবরাহ করলাম। তৃতীয় ইনকোয়ারিতে নুরুল মতিন সাসপেন্ডেড। অনেকগুলো অভিযোগ তাঁর বিরুদ্ধে। অনেক জাজল্যমান প্রমান।

(চলবে)

একান্তরের স্মৃতিকথা এবং তারপর ..

মোলা বাহাউদ্দিন

৩য় পর্ব

‘স্বাধীনতার স্বাদ’

ঘরে ঘরে পৌঁছে দিতে হবে

একদিন সবই গল্প হয়ে যায়। গল্পের চরিত্রগুলো আমাদের সমাজেই বিচরন করে। এসব চরিত্রের ক্রিয়াকর্মগুলো আমাদের প্রভাবিত করে। আমরা কখনও খুশি হই, কখনও উত্তেজিত হই আবার কখনও হিংসায় জ্বলে মরি। কোন কোন চরিত্রের অপকর্মের জন্য সমাজ তথা জাতিকে মাসুল দিতে হয়। পৃথিবীর মানচিত্রে একটা নতুন দেশের জন্ম হয়েছে বাংলাদেশ। এখন একটা ধ্বংসস্তুপ। দেশটাকে গড়তে হবে। বঙ্গবন্ধুর অমর বানী কোন কাজে লাগেনি। যাদের হাতে স্বাদ পৌঁছে দেবার ক্ষমতা ছিল তারা এই আকুতির কোন তোয়াক্কা করেনি। যে যেদিকে যে সুযোগ পেয়েছে সেখানেই লুট করা শুরু করে স্বাধীনতার স্বাদ নিজেরাই গ্রহন করতে লাগল। দেশের মঞ্জলের জন্য তাদের মাথাব্যথা নেই। তারা নিজেদের, নিজের আত্মীয়স্বজন আর চামচাদের লুট করার সুযোগ করে দিয়ে দেশটাকে একটা দুর্ভীক্ষের দিকে ঠেলে দিল।

রিয়াজ মারামারিতে জড়িয়ে গেছে। পাড়ার ষোল ডিভিশনের ছেলেরা কি নিয়ে খুব বাহাদুরি করছিল। সে তাদের কাছে হার মানবে কেন। কয়েকটার মাথা ফাটিয়ে, হাত ভেঙে এখন স্কুলে যাওয়া বন্ধ। যে কোন সময় আবার শুরু হতে পারে। ওরা একটু সুস্থ হলেই হল। ওরা সুস্থ হয়ে যখন জানতে পারল এটা আসল মুক্তিযোদ্ধা তখন তারা হার মেনে রিয়াজকে গুস্তাদ মেনে নিল। গুস্তাদ হবার পরই রিয়াজ আর স্কুলে যাবেনা বলে জানিয়ে দিল। তখন কেপ্টেন হারুনের কথা মনে পড়ল। তাঁর কথাই ঠিক হল। রিয়াজ আমার চেয়ে অনেক এগিয়ে গেছে। তাকে একটা ব্যবসা করতে বললাম এবং নাবিস্কু’র এজেন্সি এনে দিলাম। কাজ হল না। এসব ছোট খাটো ব্যবসা তার পোষাবে না। কিছুদিনের মধ্যেই ছেড়ে দিল। পরে এই এজেন্সি যার হাতে গেল সে এখন কোটিপতি।

মুক্তিযোদ্ধা হিসেবে আমার পদোন্নতির জন্য কাজ চলছে।

বাংলাদেশ ব্যাংকের বিশেষ কাজগুলো মিনিষ্টি অব ফাইনেন্সের অনুমোদন লাগে। আমার পদোন্নতির ফাইল গেল মিনিষ্টি অব ফাইনেন্সে। ফাইলটা পৌঁছার পর ফাইল নিয়ে ইঞ্জিনিয়ারিং চলল। আমার অতীত বর্তমান সবকিছুর তালিকা হল।

ফাইনেন্স সেক্রেটারি তখন ছিলেন কফিলউদ্দিন মাহমুদ। তিনি নুরুল মতিনের দূর সম্পর্কের আত্মীয় এবং একই জেলার মানুষ। কফিলউদ্দিন মাহমুদ তখন নুরুল মতিনের ফাইল নিয়েও কাজ করছে। কিছুদিনের মাঝে নুরুল মতিনের সাসপেনশন তোলে নেয়া হল এবং তাকে ব্যারিংক ট্রেনিং সেন্টারে পোষ্টিং দেয়া হল। তাতে তার পদাবনতি হল। চাকরি বাচিয়ে রাখার জন্য তিনিও তা মেনে নিতে বাধ্য হলেন। কিন্তু মানসিকভাবে ভেঙে পড়লেন। তাঁর অধস্তন কর্মচারির অধিনে অনেক দিন কাজ করার পর, অবনতির শেষ ধাপে পৌঁছে নিজেকে আর সামাল দিতে পারেননি। ১৯৮৭ সালে তিনি আত্মহত্যা করেন।

মরুপলাশ গ্রুপ অব পাবলিকেশন্স রিয়াদ, সউদীআরব কর্তৃক প্রকাশিত।। পৃষ্ঠা # ১৯/৩৪

প্রকাশকালঃ ০২বৈশাখ ১৪১৭বাঙলা। ১৫এপ্রিল ২০১০

www.marupalash.net

e-mail: marupalash@gmail.com

স্বাধীন বাংলায় এই প্রথম বিসিএস পরীক্ষা নেয়া হবে। আমি দরখাস্তের ফরম এনে সব ঠিকঠাক করে জমা দিব। একদিন আমার বসের সাথে কথা বললাম। তিনি বললেন, বাইরে গিয়ে আর লাভ কি? ব্যাংকেই তো আপনার প্রমোশন হয়ে যাচ্ছে। সবকিছু তো পাঠিয়ে দিয়েছি। এখন মিনিষ্টির অনুমোদন আসলেই হল। খুব শীঘ্রই এসে যাবে। একটু ধৈর্য ধরুন।

আমিও ভেবে দেখলাম কথাটা তিনি ঠিকই বলেছেন। তখনও জাতীয় পে স্কেল পরিবর্তন হয়নি। বাংলাদেশ ব্যাংকের কর্মচারির বেতন ছিল সবচেয়ে বেশি। যোগ্যতার মাপকাঠিও ছিল বেশি। চাকরির সুযোগ সুবিধা ছিল অনেক। তখন কে ভেবেছিল পেস্কেল হয়ে যাবে তেলে পানিতে একাকার।

মুক্তিযোদ্ধা হিসেবে পদোন্নতির নিয়ম ছিল মুক্তিযোদ্ধা হিসেবে একটা পদোন্নতি। আমি তখন ব্যাংকে সিনিওরিটি হিসেবে পদোন্নতির প্রথম সারিতে। সিনিওর হিসেবে আমার পদোন্নতি হবার পর যদি মুক্তিযোদ্ধা হিসেবে পদোন্নতি হয় তাহলেই আমার কিছু প্রাপ্তি হয়। মিনিষ্টি অব ফাইনেন্স এই সুযোগটা ব্যবহার করল। অবশ্য তার সাথে ব্যাংকে নুরুল মতিনের কিছু প্রেতাত্মাও মনে প্রানে কাজ করে সিনিওরিটির প্রমোশনের আগেই মুক্তিযোদ্ধা হিসেবে প্রমোশন দিয়ে দিল। ফলে পরবর্তি প্রমোশনের জন্য সিনিওরিটি লিফ্টে আমি এখন সর্বকণ্ঠ। তার মানে পরবর্তি প্রমোশন কয়েক বছর লাগবে। দেখা গেল মুক্তিযোদ্ধা হিসেবে আমার এই প্রমোশন হল ঠিকই, কিন্তু কোন কাজেই লাগল না। এদিকে বিসিএস পরীক্ষার তারিখও শেষ হয়ে গেল। পরবর্তি বিসিএসএর জন্য আমার বয়স পেরিয়ে যাবে। এখন উপায়! মনটা বিষিয়ে গেল। কাজ করার উৎসাহ হারিয়ে গেল। দিন রাত ভাবতে লাগলাম এখন কি করব!

অস্ত্র জমা হয়ে গেছে। রাজনৈতিক নেতাদের মুখের বুলি পাল্টে গেছে। গলার স্বর বদলে গেছে। এতদিন মুক্তিযোদ্ধার সাথে কথা বলার সময় একটা সমীহ ভাব নিয়ে কথা বলত, এখন নেতাসুলভ কথা বার্তা। দেশটা নেতারা স্বাধীন করেছে, স্বাধীনতার স্বাদ তারা গ্রহণ করবে। তারা দেশের ভবিষ্যত হর্তাকর্তা। যা কিছু করার তারা এই নেতা পাতি নেতা তসু নেতারা করবে এবং তারা শধু তারা। কোথায় কোন মার্কেটে বিহারির দোকানপাট ব্যবসা আছে, কোথায় কোনখানে বিহারির বাড়ী, জমি জমা ছিল এসব খুজে বের করা এখন নেতাদের কাজ। তাদের হাতে ১৬ ডিভিশন আছে, দখল করা একদম সোজা। কার কোন আত্মীয়কে কি দিতে হবে, কার চাকরি কোথায় হবে সব করবে এই নেতারা। সরকারি কোন অফিসে কি সুযোগ আছে সে সুযোগ পারে এই নেতারা, তাদের চামচা আর আত্মীয়স্বজন। ন্যায় অন্যায়ের কোন বলাই নেই। তাদের চাই কড়ি আর সম্পদ। দেশ রসাতলে যাক, তাতে তাদের কিছু যায় আসে না। চুরি আর চুরি। যে যেখানে পারে সেখানেই সিধ কাটছে। এখন আসল মুক্তিযোদ্ধার হাতে অস্ত্র নেই অতএব ধমক দিলেও কিছু করার নেই। মুক্তিযোদ্ধারা যেন এক অসহায় জীব। যদি কোন মুক্তিযোদ্ধা এই নেতাদের দুর্নীতির সামান্যতম উচ্চবাচ্চ করে তাহলে দুদিন পর তার লাশটা পাওয়া যাবে খালের পাড়। বঙ্গবন্ধু নিজেই বলেছিলেন, 'আমার চারপাশে চোর আর চোর।'

এমনি এক নেতার সাথে আমাদের বন্ধুত্ব। তিনি হলেন তেজগা এরিয়ার এমপিএ অধ্যাপক শামীম মিসির। সত্তরের নির্বাচনী জোয়ারে তিনি এমপিএ হয়েছেন। আসলে তিনি আমাদের বন্ধু ছিলেন না। আমাদের বন্ধু ইঞ্জিনিয়ার বাচ্চুর চাচা। তাস খেলতে খেলতেই কখন যে তিনি আমাদের বন্ধু হয়ে গেলেন কেউ খেয়াল করিনি। কিন্তু একটা ফারাক থেকে গেল। আমরা তার অনেক জুনিয়র বলে তিনি আমাদেরকে তুমি সম্বোধন করতেন, আর আমরা আপনি বলতাম। সত্তরের নির্বাচনে আমরা তার কাজ করেছি। স্বাধীনতার পর দেখলাম তিনি আমার পিছু ছাড়ছেন না। যখন তখন তিনি গাড়ী পাঠিয়ে দেন, আমার কি লাগবে সব সময় ব্যস্ত থাকেন। অফিস ছুটির সময় প্রায়ই তিনি ব্যাংকের গেইটে গাড়ী নিয়ে অপেক্ষা করেন। তাস খেলা হয় তার বাসায়। আরও দু'একজন নিয়ে আড্ডা হয়। খাওয়াদাওয়া চলে। এক সময় বললেন, তুমি বাসা ভাড়া করে থাক কেন? আমার বাড়ি তো সবটাই খালি। ওই সামনের রুমটা তোমাকে সাজিয়ে দিচ্ছি। তোমার ইচ্ছেমত তুমি থাক। একটা কাজের লোকও থাকবে। কোন অসুবিধা হবে না। একই কথা প্রতিদিন বলে আমাকে সে কথায় নিয়ে এল। তাছাড়া তাস খেলার নেশাটাও কম নয়। আমাকে দুর্বল করে দিল। আমি এক সময় তার বাংলায় গিয়ে উঠলাম।

তার বাড়ীটা হল খিলগাও চৌরাস্তায়। যেদিন উঠলাম সেদিনই পাড়ার বেশ কয়েকজনকে সে দাওয়াত করে ছোটখাটো একটা টি পার্টির ব্যবস্থা করল। সবাইকে বলল, এখন থেকে বাহার এখানেই থাকবে। ওকে এই রুমটা দিয়ে দিয়েছি। সে চাইলে বাড়ি দিয়ে দিব। মিসরের সেবা যত্ন দেখে আমি অনেকটা কাবু হয়ে গেলাম। দুদিন যেতে না যেতেই খেয়াল করলাম স্থানীয় মুক্তিযোদ্ধারা তার সাথে যোগযোগ রাখছে না। যখন জানতে পেলাম যুদ্ধকালীন সময়ে মিসর তার গুডবাহিনী দিয়ে একজন মুক্তিযোদ্ধাকে খুন করেছে, যার প্রতিশোধ নেবার জন্য কেউ কেউ এখন ওং পেতে আছে তখনই বুঝলাম আমাকে এখানে আনার মানে কি। যেদিন এই কাহিনী শুনলাম সেদিনই আর মিসরের বাড়ীতে ফিরে যাই নাই। কিন্তু মিসরের উদ্দেশ্য হাসিল হয়ে গেছে। যারা প্রতিশোধ নেবে তারা আমাকে চিনে। আমি নাকি মিসর আলির ডান হাত। অতএব ..

মিসরের বাসা ছেড়েছি কিন্তু তাতে আমাদের তাস খেলা বন্ধ হয়নি। যেখানে সুবিধা, যখন সুবিধা সেখানেই বসে পড়ি। গাড়ী নিয়ে মিসর সব সময় প্রস্তুত থাকে, কখন কোথায় যেতে হবে। আমার বাহন এখন মিসরের গাড়ী। সদা প্রস্তুত। আমার যাতে কোন অসুবিধা না হয় সেদিকে মিসরের সদা ব্যস্ততা।

একদিন মিসর অফিসে এল লাঞ্চার আগে। বলল আজ তিনি লাঞ্চার করাবেন। নিয়ে গেলেন স্টেডিয়ামে। লাঞ্চার শেষে আবার অফিসে রওয়ানা দিলাম। গাড়ীটা এসে থামল টিকাটুলির মোড়ে। মিসর বলল, আস তো তোমাদের তাইজুদ্দিন সাবের সাথে দেখা করে আসি।

তাইজুদ্দিন সাব বাংলাদেশ ব্যাংক রেজিস্ট্রেশন ইউনিটের প্রধান। একবারে সাদাসিধে অমায়িক মানুষ। তবলীগ করেন। আমাকে খুঁবি সমীহ করেন। ব্যাংক ভবনে স্থান সংকুলান না হওয়ায় এখানে ভাড়া নিয়ে অফিস চলছে। এখান থেকে যত রকমের ব্যবসার লাইসেন্স দেয়া হয়। ইম্পোর্ট, এক্সপোর্ট ইত্যাদি। আমি অতশত কিছু ভারিনি। ভাবলাম তাইজুদ্দিন সাবের সাথে দেখাটা করেই আসি। মিসরের সাথে গিয়ে উপস্থিত হলাম অফিসে। আমাকে দেখেই তাইজুদ্দিন সাহেব দাড়িয়ে গেলেন। অথচ ব্যাংকের পদ অনুযায়ী তিনি আমার অনেক অনেক উপরে। আমাকে দেখে তাঁর দাড়িয়ে যাবার কথা নয়। মিসরকে বললে, উনাকে আবার কষ্ট দিতে গেলেন কেন? আপনি কাল পরশু একবার আসেন। বলে তিনি পিয়নকে ডেকে চায়ের আদেশ দিলেন। চা খাবার সময় আমাদের নেই বলে চলে এলাম।

পাঁচ বছর পর একদিন তাইজুদ্দিন সাবের সাথে দেখা। তিনি জিজ্ঞেস করলেন, আপনি কয়টা নিয়েছিলেন?

আমি থ হয়ে জিজ্ঞেস করলাম, কি?

ওই যে মিসর আলীকে দশটা ইম্পোর্ট এক্সপোর্ট লাইসেন্স দিলাম! সেগুলো!

তাই নাকি!

সাহেব আপনি তো খুব বোকা মানুষ! আপনার কথা বলাতেই তো এতগুলো লাইসেন্স দিলাম।

এখন শামিম মিসর হজ করে হাজি সাব হিসেবে বেশ ভাল আছেন। জীবনে একবারই এমপিএ হয়েছেন, আর কোনদিন রাজনীতি করারও ইচ্ছে নেই। এখন সম্পদ দেখাশোনা নিয়ে ব্যস্ত। তার সম্পদের পাহাড় কত তা আমার জানার কথা নয় কারণ তিনি নিজেই জানেন না।

গোড়ান বাজারে সাবেরদের রেফুরেন্ট। এখানে ভাল চা হয়। প্রায়ই সেখানে চা খেতে যাই। দু'একজনের সাথে আড্ডা হয়। এই রেফুরেন্টে একদিন বজলুল হক পরিচয় করিয়ে দিল একজন ভদ্রলোকের সাথে। তার আগে বজলুল হকের একটু পরিচয় প্রয়োজন। লেখাপড়া জানে না। কোন কাজ নেই। বাজারে এদিক সেদিক ঘুরে বেড়ায়। আগ বাড়িয়ে সবাইর সাথে কথা বলে। বাজারে রেশন দোকানের সামনে বেশিরভাগ সময় কাটায়। যখন তখন রেফুরেন্টে দেখা মিলে। গোড়ানের কোথায় থাকে তা জানি না। আমার সাথে পরিচয় মানিকের মাধ্যমে। এই রেফুরেন্টেই। বজলু যার সাথে পরিচয় করাল তার নাম রেজাউল হক। বজলু বলল, উনি ফুড ডিপার্টমেন্টে

আছেন। আমাকে পরিচয় করাবার সময় বজলু বলল, বঙ্গবন্ধুর নিজের লোক। গভর্নরও কিছু করতে পারে নাই, ইত্যাদি অনেক বানানো গল্প। তারপর থেকে যতবারই রেজাউলের সাথে দেখা হয়েছে ততবারই সে আমাকে কোন বিল পরিশোধ করার সুযোগ দেয় নাই। আগ বাড়িয়ে বিল দিয়েছে, যা খেতে চাইনি তাও সামনে এনে হাজির করেছে। আমি খেলে সে খুব খুশি হয়। দেখলাম ভদ্রলোক খুব অমায়িক। কথাবার্তা ব্যবহারে আমি আকৃষ্ট হয়ে গেলাম। দুজনের খুব ভাব হয়ে গেল।

দেশে তখন হাহাকার। খাদ্য বস্ত্র ঔষধের আকাল। যাকে বলে দুর্ভিক্ষ। রেশনের উপর মানুষ নির্ভর করছে। যাদের রেশন কার্ড আছে তারা অন্তত না খেয়ে মরছে না। একটা রেশন কার্ডের জন্য হন্যে হয়ে ঘুরছে। যাদের কার্ডের প্রয়োজন, যাদের প্রাপ্য তারা পাচ্ছে না। চলছে ঘুষ বাণিজ্য। যারা ঘুষ দিতে পারছে তারাই পাচ্ছে রেশন কার্ড। একটার জায়গায় দশটা বিশটা। তখন একটা রেশন কার্ডের মূল্য কত হতে পারে আজকে কেউ চিন্তাও করতে পারবে না। রেশনে পাওয়া দশ পনের টাকার চাল ডাল বাজারে বিক্রি হত দেড় দু'শ। ধরা যাক মাসে একটা রেশন কার্ড থেকে পাঁচ ছয় শ টাকা। যার হাতে দশটা কার্ড আছে তার আয় কত? আর তখন দশ হাজার টাকা দিয়ে এক বিঘা জমি পাওয়া যেত এই শহর তলিতে আজ যার মূল্য কোটি টাকা। এমনও নেতা পাতি নেতা ছিল যাদের শত শত রেশন কার্ড ছিল। রেশন দোকানের সাথে তাদের একটা রফা ছিল। তাতে রেশন দোকানের মালিকও ভাগ পেত। যাদের একটা রেশন দোকান ছিল তারা বড়লোক। কোন কোন পাতি নেতার কয়েকটা রেশন দোকান ছিল। তারাই আজকে বাংলাদেশের ধনীদের একজন। আমার জানামতে শাহজাহানপুরের এক রেশন দোকানের ওজনদার কাপাসিয়ায় নিজের বাড়ী যেত লঞ্চ ভাড়া করে। যাক রেজাউলের কথা বলছিলাম। এক সময় লঞ্চ করলাম যখনই রেজাউলের সাথে দেখা হয় সে যেন কিছু বলতে চায়। বেশিরভাগ সময় রেষ্টুরেন্টেই দেখা হয়। বলতে গিয়েও কি যেন বলছে না। আমিও জিজ্ঞেস করিনি কিছু বলবে কি না। তারপর নিজের বেঁচে থাকার তাগিদে আস্তে আস্তে সবদের রেষ্টুরেন্টে যাওয়া কমে গেল, এক সময় গোড়ান ছেড়ে দিলাম। রেজাউল বা বজলুর সাথে দেখা হয় না।

বছর দুয়েক পর একদিন ব্যাংকের কেশ ডিপার্টমেন্টে গেলাম কি একটা কাজে। আমরা হেড অফিসে। কেশ বিভাগে আমাদের যাবার প্রয়োজন পড়ে না। সেখানে যেতেই মাখন বলল, তোর জ্বালায় আর পারি না। তোর কতগুলি বন্ধু আছে রেশন দোকানদার?

রেশন দোকানদার আমার বন্ধু?

হ্যা, তোর বন্ধু। একটা না, ডজন খানেক তো হবেই। এই দেখ আজকেও তিনটা চালান নিয়ে এসেছে। বলে সে তিনটা চালানের কাগজ দেখাল।

কি বলিস তুই? কিসের চালান? কার চালান?

রেশন দোকানের চালান। এই দেখ, একটা গোড়ান বাজারের ঠিকানা, আর দুটো শাহজাহানপুরের ঠিকানা। এরা তো এসে বলে তুই পাঠিয়েছিস। তাই লাইনে দাড়াতে হয় না। আমি করে দিই।

চালান কথাটা একটু ব্যাখ্যা করা প্রয়োজন। সরকারের ঘরে যত রকম টাকা জমা হয় তা একটা চালানের মাধ্যমে দিতে হয়। বিশেষ করে ফুড ডিপার্টমেন্টে যেসব টাকা জমা হয় তার বেশিরভাগই জমা দেয় রেশন দোকানদার। তারা ব্যাংকে টাকা জমা দিয়ে চালানের কপি ফুড ডিপার্টমেন্টে জমা দিলে রেশনের মালামাল পেয়ে যায়। আর তা করতে হয় প্রতি সপ্তাহে। এই চালান জমা দেবার জন্য লাইন দিতে হয় বাংলাদেশ ব্যাংকে। লাইনে কয়েক হাজার মানুষ হয়। সকালে লাইনে দাড়াতে বিকেলে হয়ত লাইন আসে। না হয় পরের দিন আবার লাইন। এই লাইন নিয়ে তখন ব্যবসা চলছে। অনেকেই লাইনে দাড়িয়ে সারাদিন নষ্ট করতে চায় না। তাই একটা বেকার লোক নিয়োগ করে। সারাদিনের জন্য তাকে টাকা দেয়। তারও একটা রোট ছিল। সেই লাইন বাচাবার জন্য কারা এই কাজটা করছে ঠিক বুঝতে না পেরে মাখনকে জিজ্ঞেস করলাম, যারা আসে তাদের তুই চিনিস?

চিনবনা কেন? অনেক দিন থেকে প্রতি সপ্তাহে আসে। এই তো আগামী সপ্তাহে আসবে।

তুই এদের কারও নাম জানিস?

একজন আসে তার নাম বজলু।

এর পর আসলে পুলিশে দিয়ে দিবি।

তার মানে তুই চিনিস না? আবার আসুক, দেখাব মজা!

মাখন কোন মজা দেখিয়েছিল কিনা জানি না, কারন মাখন আর কোনদিন এ নিয়ে কথা বলেনি। আমার মনে হয়েছে মাখনের সাথে বজলুর ভাব হয়ে গিয়েছিল।

আমি বাংলাদেশ ব্যাংক মুক্তিযোদ্ধা কল্যান সমিতির প্রেসিডেন্ট, ভোগ্যপন্য সমবায় সমিতির জেনারেল সেক্রেটারি। আমার হাত দিয়ে কত লক্ষ কোটি টাকার আদান প্রদান হচ্ছে। আমার একটা সই লক্ষ লক্ষ টাকা এনে দেয়। আমি ইচ্ছে করলে কি না করতে পারি। চারদিকে কত রকম পারামিটের খেলা চলছে। গেলেই হল। মনে প্রশ্ন আসে, কেন? আমার পাওনা থাকলে হাতে আসবে।

কিন্তু বাংলাদেশে তা হয় না। পাওনাও না চাইলে হাতে আসে না। হাতের কাছে যা আছে তাও না। ধরে আনতে হয়। তার প্রমান আমার একমাত্র সন্তান ছয় মাসের দুধের শিশুর দুধ নিয়ে।

লন্ডন থেকে ন্যায্যমূল্যের একটা কনসাইনমেন্ট এসেছে ঢাকা ডিসির কাছে। তাতে আছে বাচ্চাদের গরম কাপড়, গুড়ো দুধ, বড়দের জন্য সাট, পেন্ট, চাদর ইত্যাদি অনেক মূল্যবান বস্তু। নিয়ম অনুযায়ী ডিসি এই কনসাইনমেন্ট হস্তান্তর করবেন বাংলাদেশ সরকারের ন্যায্যমূল্য বিতরন কেন্দ্রে। ডিসির পিএ আমার বন্ধু। তার মাধ্যমে এই কনসাইনমেন্ট আমি নিয়ে আসি আমাদের সমিতির জন্য। নামমাত্র মূল্যে এইসব জিনিষ সদস্যদের মাঝে বিতরন করা হয়। যেদিন আড়াই হাজার দুধের কোটো বিতরন করা হল সেদিন আমার স্ত্রী সারাদিন আশায় বসে রইল আমি আজ বাচ্চার জন্য দুধ নিয়ে আসব। সন্ধ্যায় আমি ফিরলাম খালি হাতে। আমার হাতের দিকে তাকিয়ে জিজ্ঞেস করল, দুধ কই?

বললাম, আনি নাই।

কেন? এ পাড়ায় অনেকেই তো দুধ পেয়েছে। কেউ কেউ সকালেই নিয়ে এসেছে। যারা ব্যাংকে চাকরি করে না তারাও পেয়েছে শুনলাম। তুমি আন নাই কেন?

আমার হাতে তো কেউ তোলে দেয়নি। আর আমি নিজে আনতে গেলে কথা হবে। তাই।

তোমার ভাগে তো একটা ছিল? সেটা কই? আমি সারাদিন বাচ্চাকে কিছুই দেই নাই, দুধ আনবে এই আশায়! এখন কি দিব?

আমি চুপ করে রইলাম।

তারপর কাজের ছেলেটাকে দোকানে পাঠাল সুজি আনতে। সুজি জাল দিতে গিয়ে দেখে তাতে পোকা। তারপর বাইরে ছুড়ে ফেলে দিয়ে চুপ করে বসে রইল। তার চোখ ভিজে গিয়েছিল কিনা জানি না। এক সপ্তাহ আমার সাথে কথা বলেনি।

বাজারে শিশু খাদ্য উদাও। যা আছে তা স্বনের দামে বিক্রি হয়। পরে শুনলাম এই দুধ নিয়ে অনেকে ব্যবসা করেছে। যাদের বাচ্চা নেই তারাও দুধ নিয়েছে এবং চড়া দামে বিক্রি করেছে। তারই কিছু আমাদের পাড়াতেও এসেছে।

১৯৭৬ সালে আবার ব্যাংকে ঝামেল হল। উত্তেজিত কর্মচারিরা গভর্নর নাজির উদ্দিনকে অপদস্থ করে বের করে দিল। মামলা হল ২৭ জনের বিরুদ্ধে। দেখা গেল আমার নামটা প্রথম। অথচ আমি সেদিন অফিসেই ছিলাম না। খোজ খবর নিয়ে জানলাম নুরুল মতিনের প্রেতাচার কাজ। আমাকে ফাসাতেই হবে। তাই এখানে আমার নামটা প্রথম। মামলা স্থানান্তরিত করা হল মার্শাল ল কোর্টে। আসামি আমরা সাতাশ জন। জিয়াউর রহমানের মার্শাল কোর্টে স্থানান্তরিত করার উদ্দেশ্য হল। মুক্তিযোদ্ধার শাস্তি অবধারিত। আমরা সবাই কোর্টে আত্মসমর্পন করার পর জামিন দেয়া হয়নি। মামলা চলল তিন মাস। শেষ পর্যন্ত রায় হল “সসম্মানে বেকসুর খালাস”।

প্রতি পাড়ায়/মহল্লায় দু'একজন সাধারণ মানুষের ঘরে স্বাধীনতার স্বাদ এমন ভাবে পৌঁছে গেল যা মানুষকে অধঃপাতের দিকে ঠেলে দিল। তারা রাতারাতি ব্যসবা, বাড়ী গাড়ীর মালিক হয়ে গেল। অথচ দুদিন আগেও যারা ছিল অতি সাধারণ বা তারও নীচে। রাতারাতি তাদের চালচলন বদলে গেল। তা দেখে সাধারণ মানুষের মনে হিংসার উদ্বেগ হল। স্বাধীনতার ভাগ পেতে সবাই মরিয়া হয়ে উঠল। স্বাধীনতার ভাগ চাই! নৈতিকতার কোন বালাই নেই। ভাগ চাই। সবই সুযোগের সন্ধানে আছে। শ্রমজীবী মানুষ অনেক এগিয়ে গেল। তাদের প্রায় প্রতিটি দাবী পূরণ হল। নেতা পাতিনেতা আর চামচার উঠে গেল উপরের কাতারে। গ্যাড়াকলে আটকা পড়ল মধ্যবিত্ত শ্রেণী। তারা না পারল উপরের কাতারে উঠতে না পারল নীচে নামতে।

১৯৭৪ সালে দুর্ভীক্ষ প্রকট আকার ধারণ করলে মধ্যবিত্তরা অতিষ্ঠ হয়ে পড়ে। দায়ী করে আওয়ামীলীগ সরকারকে। আওয়ামীলীগের উপর মানুষের ঘৃণা এসে যায়। সবাই চায় নতুন কোন রাজনৈতিক দল যারা সবাইঐ জন্ম কিছু করবে। বঙ্গবন্ধু হত্যার পর অস্ত্র হাতে যে দলের সৃষ্টি হল তারাও আর একবার দেশটাকে লুট করল। জিয়াউর রহমান তার দলকে তুষ্ট করার জন্য ব্যবসা বানিজ্য ভাগ করে দিল তার আর্মির হাতে। রিটার্ডার্ড আর্মিদের এমন সব জায়গায় বসিয়ে দিল যেখানে শুল্ক ঘুষ বানিজ্য চলে। বেশিরভাগ ব্যবসা চলে গেল রিটার্ডার্ড আর্মির হাতে। রাজাকার পুনর্বাসন করে দেশটাকে আর একবার অবনতির শেষ ধাপে পৌঁছে দিল। এই সময় অনেক মুক্তিযোদ্ধা নীতি বিসর্জন দিয়ে যোগ দিল বিএনপিতে সুযোগ সুবিধা পেয়ে।

আত্মীয়স্বজন বন্ধুবান্ধব সকলের বাক্যবান আর সহ্য হয়না। আগে থেকেই এসব প্রশ্ন শুনতে শুনতে কানে তালা দিয়েছি। সকলে একই প্রশ্ন করে, ওমক এত কিছু করে ফেলল, তুমি কি করলে? অমুক নেতার কাছে গেলেই তো তুমি অনেক কিছু করতে পার, যাচ্ছনা কেন? আগে নিজের জন্য কিছু কর তারপর সততা। নতুন করে এইসব শুনতে শুনতে আরও হতাশ হয়ে গেলাম। কোন কোন পরিচিত মানুষকে দেখে আমার নিজেরও খুব খারাপ লাগত। কতভাবে তারা স্বাধীনতা ভোগ করছে। অথচ তাদের ইতিহাস আমি জানি। নিজকে মনে হল আমি কত অসহায়। শেষ পর্যন্ত সিদ্ধান্ত নিলাম ব্যাংক ছেড়ে দেব।

ব্যাংক ছেড়ে যাব কোথায়! বিদেশ! কিন্তু টাকা কোথা পাব! কোন্ দেশে যাব! তিনটা দেশের কথা মনে মনে আওড়ালাম। আমেরিকা, লন্ডন অথবা মধ্যপ্রাচ্য। তখন পেট্রোরিয়ালের যুগ। বাঙালিরা বেশিরভাগই সেদিকে ছুটছে। সেখানে যাওয়াটা তখন অনেকটা সোজা।

বাংলাদেশে তখনও সৌদি আরবের কোন দুতাবাস নেই। ভিসা পেতে হলে অন্য দেশে যেতে হবে। হয়ত পাকিস্তান নয়ত ইন্ডিয়া অথবা ধারে কাছে অন্য কোন দেশে।

ব্যাংকের ডিপুটি গভর্নর জনাব আলী কবীর সাহেব আমাকে খুব স্নেহ করেন। একদিন তিনি বললেন, তুমি ব্যাংক ছেড়ে দাও। অন্য কোথাও চাকরি দেখ অথবা বিদেশ চলে যাও। আমি তোমাকে সাহায্য করব।

বললাম, আমি নিজেও একথাই ভাবছি। বিদেশ যেতে হলে টাকার প্রয়োজন। আমার এমন টাকা নেই যে বিদেশ যাব।

কত টাকা লাগে বিদেশ যেতে?

ভাবছি সৌদি আরব যাব। সেখানে গেলে হাজার দশেক টাকা হলেই চলে।

তুমি চেষ্টা করলেই এই টাকার ব্যবস্থা করতে পার। ব্যবস্থা না হলে আমার কাছে এসো।

আমি কি চেষ্টা করব! ভাবলাম ভাগিনা মিন্টুর কথা। তার এক ফুফা আছে রুপালী ব্যাংকে। অনেক ক্ষমতাবান।

একদিন মিন্টুর সাথে আলাপ করলাম। মিন্টু খুব খুশিমনে বলল, এখনই আমি ফুফার কাছে যাব। আপনার জন্য কিছু করতে পারলে নিজকে আমি ধন্য মনে করব।

মিন্টু রাতেই ফিরল। এসে বলল, ব্যবস্থা হবে। তবে একটা কাজ করতে হবে। সেটা হল, আপনার একটা জায়গা আছে। তার দলিলটা জমা রাখতে হবে। তার বদলেই আপনি টাকা পেয়ে যাবেন।

টাকার চিন্তা করতে করতে কোন কুল কিনারা পাচ্ছিলাম না। এত সহজে ব্যবস্থা হয়ে যাবে ভাবতে পারিনি। খুশিতে মনে মনে আকাশে উড়তে লাগলাম। দলিল জমা দিয়ে এক সপ্তাহের মাঝে টাকা হাতে পেয়ে গেলাম।

দিল্লী যাব। থাই এয়াওয়েজে টিকেট কিনে ফেললাম। ৩রা মার্চ ১৯৭৭ তারিখের জন্য। আর মাত্র এক সপ্তাহ হাতে আছে। টুকটাক সব কাজ শেষ করতে হবে। একবার ইচ্ছে হল লতিফ ভাইর সাথে দেখা করে যাই। অন্তত তাঁকে বলে যাই আমার অবস্থা এবং কেন দেশটা ছেড়ে যাচ্ছি। এই ভেবে একদিন তাঁর অফিসে গেলাম। তিনি তখন অনেক বড় পদে আসীন। আমাকে দেখেই বললেন, বস। অনেকেই আসে, কিন্তু তোমাকে দেখলাম না। এখন তো সব পারমিট বন্ধ হয়ে গেছে।

মনের ভেতর একটা ঝাকুনি অনুভব করলাম। এটা কি রাগ দুঃখ ব্যাথা না আঘাত সেটা বুঝতে পারলাম না। আমি এসেছি উনার সাথে সৌজন্য সাক্ষাত করতে, আর শুনতে হল পারমিট দেয়া বন্ধ হয়ে গেছে! তাহলে উনার কাছে যারাই এসেছে পারমিটের জন্যই এসেছে! আমি যদি পারমিটের জন্য আসি তাহলে বাহান্তর থেকে সাতান্তর এই পাঁচ বছরে আসিনি কেন? তিনি চায়ের অর্ডার দিলেন। বললাম, না চা আমি খাইনা, আর পারমিটের জন্য আমি আসিনি। আপনার সাথে অনেক দিন দেখা হয়না, খুব ইচ্ছে করছিল আপনার সাথে দেখা করি, তাই এসেছি। আপনার ভাই রঞ্জু এখন কোথায়? কি করে?

আমি জানি রঞ্জু এখন দামী গাড়ী, পোষাক পড়া ড্রাইভার নিয়ে চলে। একদিন ব্যাংকে দেখা হয়েছিল। এসেছিল বৈদেশিক মুদ্রার প্রয়োজনে। বলছিল কি সব বড় বড় ব্যবসা করে। কয়েক দিন পর পরই বিদেশে যায় ইত্যাদি। এই রঞ্জু আগরতলায় হোটেল থেকে রাজনৈতিক মর্ষাদা নিয়ে দিন কাটিয়েছে।

রঞ্জু তো এখন ব্যবসা করে। তোমার চাকরি কেমন চলছে?

ভাল। আচ্ছা চলি, আবার আসব বলে চলে এলাম। যা বলতে গিয়েছিলাম তা আর বলা হলনা।

আর মাত্র দুদিন বাকি। আগামীকাল শেষ অফিস। অফিসের কেউ জানে না আমি চলে যাব।

অফিস থেকে বের হয়ে রিক্সায় উঠতে যাব এমন সময় একটা গাড়ী এসে থামল পাশে। বের হয়ে এল রেজাউল। সেই ফুড ডিপার্টমেন্টের রেজাউল। কেমন আছেন বাহার ভাই? চলুন আপনাকে পৌঁছে দিব বলে দরজা খুলে দাঁড়িয়ে রইল।

আমি অনেকটা ভ্যাবাচেকা খেয়ে তাকিয়ে রইলাম। রেজাউলের বেশভূষা সব বদলে গেছে। পরনে দামী সুট। গাড়ী-ড্রাইভার। আমাকে কিছু বলার সুযোগ না দিয়ে রেজাউল আবার বলল, উঠুন! প্লিজ! আমি যন্ত্রচালিতের মত গাড়ীতে উঠলাম। একথা সে কথার পর জানলাম রেজাউল চাকরি ছেড়ে ব্যবসা করে। পার্টনার একজন নেতা। যখন বললাম, আগামী বুধবার আমি দেশ ছেড়ে চলে যাচ্ছি তখন রেজাউল যেন আতকে উঠল। আমার দিকে তাকিয়ে জিজ্ঞেস করল, দেশ স্বাধীন করে দেশ ছেড়ে চলে যাবেন! কি কারণে যাবেন?

বললাম, এদেশে আর চলতে পারছি না।

আমরা গাড়ীর পেছনে পাশাপাশি বসেছিলাম। রেজাউল সামনের দিকে তার মুখটা সোজাসুজি এনে জিজ্ঞেস করল, বলেন কী! আমি যে আপনাকে তিরিশটা রেশন কার্ড দিলাম সেগুলো কোথায়? আপনি পাননি? আশ্চর্য! তাহলে বজলু মেরে দিয়েছে! তাইত!

বললাম, আপনি আমার জন্য কিছু করেছেন। তার জন্য অনেক ধন্যবাদ। কিন্তু আমি জানলেও নিতাম কিনা ভেবে দেখার বিষয়। কারণ আমি কারও দয়া বা সাহায্য চাইনা। যাক এখন আর ওসব কিছুর প্রয়োজন নেই। আমার

বাসার সামনে আসতেই বললাম এখানেই নামব। তাড়াতাড়ি রেজাউলও নেমে পড়ল গাড়ী থেকে। হাতে হাত মিলিয়ে বলল, তাহলে আপনার সাথে আর দেখা হবে না!

হয়ত বেঁচে থাকলে দেখা হতেও পারে বলে আমি বাসার দিকে রওয়ানা দিলাম। পেছন ফিরে একবার তাকিয়ে দেখলাম রেজাউল তেমনি আমার দিকে তাকিয়ে আছে। কি ভাবছে সে! ভাবছে আমি একটা অপদার্থ! বোকা! একটা পরাজিত সৈনিক! নাকি পলাতক!

দুর্নীতির বিষবৃক্ষ রচিত হয়েছিল তখন থেকেই। মানুষের নৈতিক চরিত্রের স্ফলন শুরু হয়েছিল বাংলাদেশের জন্মালগ্ন থেকেই। আজ যার ফলাফল দেখতে পাই একজন মেথর কোটি কোটি কোটি টাকার মালিক। বজলুর সাথে আর দেখা হয়নি মানে আমি দেখা করার সাহস পাইনি। ২০০৬ সালে অনেকদিন বাংলা দেশে ছিলাম। আমার দুঃখের দিনগুলো যেসব জায়গায় কাটিয়েছি সেসব জায়গায় ঘুরে বেরিয়েছি।

গোড়ানেও গেছি। শুনলাম বজলু এখন সিপাইবাগে বজলু কলনির পাশে নিজের জন্য বিশেষ কায়দায় বানানো বাংলায় বসবাস করেন। তিনি এখন হাজি সাহেব এবং মির্জা আব্বাসের বিশেষ বন্ধু। তার অনেকগুলো মহা অটালিকার একটিকে বলা হয় বজলু কলনি। তার সম্পদের হিসেব তার সেক্রেটারি হয়ত জানে। তার সাথে দেখা করার সাহস হয়নি নাকি রুচি হয়নি জানিনা।

(চলবে)

একাত্তরের স্মৃতিকথা এবং তারপর ..

মোলা বাহাউদ্দিন

৪র্থ পর্ব

সৌদি ভিসার জন্য দিলী পৌঁছলাম। জানতে পারলাম বাংলাদেশ দূতাবাস একটা চিঠি না দিলে ভিসা দেবে না। তাই আগে বাংলাদেশ দূতাবাসে ধর্না দিতে হল। দু সপ্তাহ লাগল চিঠি পেতে। এই দু সপ্তাহে অনেক কিছু দেখলাম জানলাম। টাকা দিলেই চিঠি পাওয়া যায়। মুক্তিযোদ্ধার চেয়ে রাজাকারের কদর বেশি। তখনকার বাংলাদেশের জামাতের সেক্রেটারি জেনারেল মাওলানা আব্দুর রহিমের ছেলে মোস্তাফা টাকা ছাড়াই একদিনেই ভিসা পেয়ে গেল। এই কাহিনী বিশদভাবে লেখা হয়েছে আমার “কালো রক্ত” উপন্যাসে।

শেষ পর্যন্ত টাকা ছাড়াই চিঠি নিয়ে ভিসা পেলাম। পৌঁছলাম জেদ্দা শহরে। সেদিনই ওমরা করে পরের দিন থেকে চাকরি খোজা শুরু হল। চাকরি নেই তবে কাজ আছে। কাজ মানে লেবারের কাজ। কাজ করার এখনও অবস্থা হয়নি আমার। আগে চাকরির সন্ধান করে দেখি। না পেলে কাজ করব।

ভাগ্য সুপ্রশন্ন। একজন লোকের খোজ করতে গিয়ে চাকরি পেয়ে গেলাম। একবারে ম্যানেজার। তখন জেদ্দা শহরে কোন বাঙালি ম্যানেজার ছিল বলে জানা নেই। খবরটা বাংলাদেশ দূতাবাসেও গেল। আমাকে অভিনন্দন জানানোর জন্য এসেছিলেন দুজন কর্মকর্তা। খবরটা ছড়িয়ে গেল।

অফিস ছুটির পর বাইরে এসে দেখি কয়েকজন লোক অপেক্ষা করছে। প্রথমে বাঙালি বলে নিশ্চিত হওয়া যায়না। কারন তাদের পরনে সৌদি পোষাক। তাদের একজন এগিয়ে এসে করমর্দন করে বুকে বুক লাগিয়ে কোলাকুলি শেষে নিজের পরিচয় দিল। তারপর একে একে সবাই কোলাকুলি শেষে পরিচয় দিল। বলল, আপনার কথা শুনছি। তাই দেখা করতে এলাম।

এখন প্রায় প্রতিদিনই নতুন মুখ দেখি। এখন আর বাইরে অপেক্ষা করে না। ভিজিটর রুমে এসে অপেক্ষা করে।

একদিন এল লিডার গোছের একজন। তার সাথে নতুন পুরাতন মিলিয়ে ছয় সাত জন।

সকলের পরিচয়ের পর লিডার খুব বিনয়ের সাথে, হাত কচলিয়ে বলল, হুজুর আমাদের বাসায় একদিন তসরিফ নিলে আমরা খুব খুশি হব। আপনার সুবিধামত কোনদিন সময় হবে বললে আমরা এসে নিয়ে যাব।

আমার নিজেরও গাড়ী ড্রাইভার আছে। শুধু অফিসে আসা যাওয়ার জন্য। ছুটির দিন থাকেনা। বললাম, ঠিক আছে যাব। তবে যে কোন বৃহস্পতিবার। আধা বেলা অফিস, তারপর যাওয়া যাবে।

একজন বলল, আগামী বৃহস্পতিবার হুজুরের সময় হবে কি?

ঠিক আছে।

সেই বৃহস্পতিবার অফিস ছুটির পর বেরিয়ে দেখি চার পাঁচটা গাড়ী। সব গাড়ীতেই মানুষ। একটা গাড়ী একটু পরিস্কার পরিচ্ছন্ন, বাকীগুলো অনেক পুরনো। পরিস্কার গাড়ীতেই আমার জন্য নির্দিষ্ট আসন ছিল। গাড়ীগুলো চলল। মনে হল আমি একজন রাষ্ট্রপ্রধান। গার্ড দিয়ে নিয়ে যাচ্ছে। আধা ঘন্টার মধ্যেই আমরা পৌঁছে গেলাম। একটা একতলা দালান। তিনটা রুম। আমার বসার জন্য একটা চেয়ারের ব্যবস্থা হয়েছে। কারন তারা থাকে ফ্লোরে বিছানা করে। কোন আসবাবপত্র নেই। সৌদি স্টাইল। আমার আদর যত্ন এমনভাবে হল যেন বাদশাহ আকবর। প্রজাদের দেখতে এসেছে।

মরুপলাশ গ্রুপ অব পাবলিকেশন্স রিয়াদ, সউদীআরব কর্তৃক প্রকাশিত।। পৃষ্ঠা # ২৭/৩৪

প্রকাশকাল: ০২বৈশাখ ১৪১৭বাঙলা। ১৫এপ্রিল ২০১০

খাওয়াদাওয়ার পর গল্প চলল। কে কিভাবে কবে এদেশে এসেছে। বেশিরভাগই বলল দিলী থেকে ভিসা নিয়েছে। কেউ বলল পাকিস্তান থেকে। কে কোথায় কাজ করে এসব কথাও হল। হঠাৎ করে একজন প্রশ্ন করল, ব্যারিস্টার সাহেবের সাথে হুজুরের পরিচয় আছে নাকি?

কোন ব্যারিস্টার?

ব্যারিস্টার আখতারুদ্দিন, তিনিই তো বেশিরভাগ মানুষের চাকরি দিয়েছেন। এখন সৌদিয়ার লিগেল এডভাইজার।

ও, ঐ রাজাকারের কথা বলছেন! ওর কারনেই তো সৌদি আরব এখনও বাংলাদেশকে স্বীকৃতি দেয় নাই। সে দেশের শত্রু। চিনি, স্টেট ব্যাংকের লিগেল এডভাইজার ছিল।

হঠাৎ করে ঘরের পরিবেশ বদলে গেল। সবাই চুপ হয়ে গেল। বেশ কিছুক্ষন চুপচাপ বসে থেকে আমি বললাম, আচ্ছা এখন যাব। আপনাদের আর্থিতেয়ার জন্য অনেক ধন্যবাদ। বলে আমি উঠে দাড়লাম। দরজার দিকে রওয়ানা দিলাম। কিন্তু কেউ উঠছে না। আসার সময় এতগুলো গাড়ী ছিল, এখন নাই। আমাকে দরজা পর্যন্ত এগিয়ে দিতেও কেউ এলনা। আমি রাস্তায় এসে একটা টেক্সি নিয়ে বাসায় এলাম।

বসে বসে অঙ্কটা মিলাতে চেষ্টা করলাম। আমার নামের আগে মোলা দেখে তারা ভেবেছিল আমি তাদের লোক। তারপর একটা কোম্পানীর মেনেজার, ইচ্ছে করলে ভিসার ব্যবস্থা করতে পারি। তাদের দলের সৌন্দর্য বেড়ে যায়। দল ভারি হয়। যখন দেখল আমি তাদের দলের নই, তখন দরজা পর্যন্ত এগিয়ে দেয়াটা তাদের আরও লোকসান।

দিলীর দুতাবাসের কাজকর্মের সাথে তাদের কথাবার্তাও মিলে যায়। স্বাধীনতার পর দিলী দুতাবাস বেশিরভাগ রাজাকারের ভিসার ব্যবস্থা করেছে। সৌদি আরবে বেশিরভাগ রাজাকার আশ্রয় নিয়েছে। তের বছর সৌদি আরবে থেকে মুক্তিযোদ্ধার সম্মান পাইনি। নেই যে তা নয়, কেউ পরিচয় দিত না। কারন রাজাকারের মাঝে মুক্তিযোদ্ধা পরিচয় দিয়ে ঘৃনার পাত্র হতে চায়না কেউ। এই দলটা মানে রাজাকারের দলটা বসে থাকেনি। কয়েকদিন পর মালিকের খাস কামড়ায় আমার ডাক পড়ল। আমাকে বসতে বলে তিনি একটা ফাইল আমার দিকে এগিয়ে দিয়ে বললেন, দেখ তো এগুলো কি?

আমি ফাইলটা উন্ডিয়ে দেখলাম। একেগুলো চিঠি। প্রথম চিঠিতে দেখলাম লেখা হয়েছে আমি বাংলাদেশ থেকে মানুষ খুন করে ব্যাংক লুট করে অনেক টাকা পয়সা নিয়ে চলে এসেছি। আমার চরিত্র খুব খারাপ। আমার উপর কোন দায়িত্ব দেয়া মানে যে কোন সময় টাকা পয়সা মেরে চলে যাব। এমনি সবগুলো চিঠিতে অনেক রকমের অভিযোগ। একটা চিঠিতে লিখেছে আমি একজন দাগী আসামি।

বাংলাদেশে গেলে আমাকে জেলে থাকতে হবে ইত্যাদি। মোট কথা এমন সব কথাবার্তা লিখেছে তাতে বুঝা যায় আমাকে আর একদিনও চাকরিতে রাখা ঠিক নয়। সব চিঠি ভুল ইংরেজিতে লেখা। ইংরেজির নমুনা দেখে পরিষ্কার বুঝা যায় যে একই পন্ডিতের গড়া বাক্য। শুধু বিভিন্ন হাতের লেখা। তাতে বুঝা যায় তারা এক জোট হয়েই কাজটা করেছে। আমার পড়া হয়ে গেলে মালিক জিজ্ঞেস করল, সবগুলো পড়েছ?

হ্যা, পড়েছি।

তোমার বক্তব্য কি?

এগুলো সব মিথ্যে। আমাকে এক মাস সময় দাও। আমি প্রমান করব আমি কে? এসব চিঠি শত্রুতামূলক তার প্রমান আমি দিব।

শেষ পর্যন্ত বাংলাদেশ ব্যাংক থেকে চিঠি এনে মালিকের হাতে দিয়ে চাকরি রক্ষা হল। তারপরও তারা আমার পিছু ছাড়েনি। তখন জিয়াউর রহমান প্রায় প্রতিমাসেই সোঁদি আরব আসে। জেদ্দায় সব রাজাকার খুব আনন্দে আছে। প্রায় সবাই ভাল চাকরি জুটিয়ে নিয়েছে। মুক্তিযোদ্ধা তখন জিয়াউর রহমানের চোখের বালি। জেদ্দায় তখন বাঙালির সংখ্যা নগন্য। বিশেষ করে পরিবার নিয়ে থাকার মত মানুষ ছিলই না বলতে গেলে। আমার পরিবার আসার পর খোজ নিতে রাগলাম পরিবার আর কোথায আছে। একজন খোঁজে পেলাম। তিনি ডা: আবদুর রহমান, সেপোর্টে কাজ করেন। একমাত্র তার বাসায় আমাদের আসা যাওয়া। তার কিছুদিন পর মোস্তফা, দিলীতে যার সাথে পরিচয় তার স্ত্রী এসে পৌঁছল। দুই পরিবার তখন প্রায় এক হয়ে গেছে। একে অপরের জন্য সদা প্রস্তুত। সব রকমের আলাপ হয় মুস্তফার সাথে। কিন্তু রাজনীতি নিয়ে কোনদিন আলাপ হয়নি। একদিন মুস্তফা দাওয়াত দিল তার আঝা এসেছেন। আগামীকাল দুপুরে ডালভাতের ব্যবস্থা হবে।

বাসায় গিয়ে দেখি আরও কয়েকজন অতিথি আছেন। তার মাঝে দুজনকে দেখলাম আমার পরিচিত। যারা আমাকে দাওয়াত করে তাদের বাসায় নিয়ে গিয়েছিল তাদের দুজন। ওরা আমাকে দেখেই মুখ নামিয়ে নিল। আমি আরও খুশি হলাম যখন মুস্তফা তার আঝার সাথে পরিচয় করিয়ে বলল, আঝার নাম তো আপনি জানেনই। আবার বলছি, আলহাজ্ব মাওলানা আব্দুর রহিম, উনি এখন জামাতের ভারপ্রাপ্ত আমীর। জেদ্দায় বাংলাদেশ এম্বেসিতে বসে আছে বঞ্জাবন্দুর তিন জন খুনী। সবাই জিয়াউর রহমানের লোক। তার কিছুদিন পরই গোলাম আযম বাংলাদেশে ফিরে আসে এবং পরবর্তীতে নাগরিকত্ব দেয়া হয়। এসব দেখে আমি আমার মুক্তিযোদ্ধা সার্টিফিকেট লুকিয়ে ফেললাম। কোথায যে লুকালাম অনেকদিন পর খোজ করে পাইনি।

১৯৮৮ সালে চলে গেলাম নিউইয়র্ক। আগের পরিচিত দু'একজন ছিল। তাদের একজনের বাসায় উঠলাম। নিজের জন্য বাসা খুজে বের করলাম তিন চার দিনের মাঝেই। যার বাসা ভাড়া নিলাম তার বাড়ী চিটাগাং। নাম অহিদ। তার সাথে কনস্ট্রাকশনের কাজ করে আরও কয়েকজন বাঙালি। তারা সবাই আমাকে সাহায্য করার জন্য উঠেপরে লাগল। জামান সাহেব নামে একজন একটা সোসাল সিকিউরিটি কার্ড দিয়ে বলল, আপাতত আপনার কিছুই নেই, এটা ছাড়া কাজ পাবেন না। আপাতত এটা ব্যবহার করতে পারেন। ইচ্ছে করলে নিয়েও নিতে পারেন। কার্ড নিলাম, কিন্তু ব্যবহার করতে হয়নি। এদের সাথে আর একজন ছিল নামটা ভুলে গেছি, সে বলল আমার ছোট ভাই এসেছে আর্মি ট্রেনিংএ। চার বছরের জন্য। বাংলাদেশ থেকে একমাত্র একজনই সেলেস্ট হয়েছে এবং সেটা আমার ভাই।

শুনে খুব খুশি হলাম। একটা বাঙালি ছেলে আমেরিকায় এসেছে ট্রেনিং নিতে, এটা একটা সুখবর। বললাম, নিয়ে আসেন একদিন আমাদের এখানে। আমাদের সাথে খাবে একবেলা।

আমাদের উজ্জ্বল ভবিষ্যতের সন্তানকে যেদিন নিয়ে এল সেদিন সাথে ছিল জামান, অহিদ এবং ইকবাল।

ছেলেটা দেখতে ছিপছিপে, সুন্দর চেহারা। বয়স আঠার উনিশ হবে। জিজ্ঞেস করলাম, তোমার নাম কি?

আজমী।

তুমি তো আমাদের ভবিষ্যত। দেশে ফিরে গিয়ে দেশের দায়িত্ব গ্রহন করবে, হাতে থাকবে অনেক ক্ষমতা। তোমার রাজনৈতিক চিন্তাধারা কি?

আছে একটা।

সেটা কি? কোন্ দলের রাজনীতি তোমার নীতির সাথে মিলে?

জামাত। বলে একটু মুচকী হাসল। মুখের ভাব দেখে মনে হল এই কথাটা শুনলে আমি খুব খুশি হব। কারণ আমি একজন মোলা।

আমি আকাশ থেকে পড়লাম। কাকে দাওয়াত করলাম! আর তার সাথে যারা এসেছে তারা কে! আমি তো একটা বোকা। এখন তো আর অপমান করা যায় না। কোন রকমে আখিত্যেয়তা শেষ করে বিদায় দিলাম। পরে জানলাম আজমী জামাতের গোলাম আযমের ছেলে (এখন সেনাবাহিনীর চাকরি থেকে বহিষ্কৃত)। আর জামান সেই জামান যার পুরো নাম শামসুজ্জামান, বুদ্ধিজীবী হত্যাকারি কুখ্যাত খুনি রাজাকার।

কিছুদিন পর দেখলাম মুক্তিযোদ্ধা ঐক্য পরিষদ নামে একটা সংগঠন হচ্ছে। ইচ্ছে হল গিয়ে দেখি ওরা কি করতে চায়। সেই থেকে শুরু হল প্রায় সব কয়টা সংগঠনের সভায় যাওয়া। পেছনে বসে সব শুন। দেখলাম এখানে মুক্তিযোদ্ধার অভাব নেই। অনেক। যাদের বয়স যুদ্ধের সময় হয়ত ছিল আট দশ তারাও মুক্তিযোদ্ধা। প্রবাসে মুক্তিযোদ্ধা অনেক। তারা এই নিউইয়র্ক শহরে থেকে বিশ্বজনমত গড়ে তুলে আমাদের অনেক সাহায্য করেছে। তারা মুক্তিযোদ্ধা।

যুদ্ধের সময় যাদের কোন দেখা পাওয়া যায়নি, আজ বিশ বছর পর তারাও দাবী করে মুক্তিযোদ্ধা।

আসল মুক্তিযোদ্ধা বেশ কিছু আছে। তাদের সাথে সুসম্পর্ক বজায় রেখে কিছু অমুক্তিযোদ্ধা নিজেদের মুক্তিযোদ্ধা বলে দাবী করে এবং আসল মুক্তিযোদ্ধারা তাদের দাবীকে মেনে নেয় দল ভারি করার জন্য। পরবর্তীতে বেশ কয়টা সংগঠন জন্ম নিল। একটা বিএনপি সমর্থন করে, আর একটা আওয়ামীলীগ।

দেখা গেল একটা প্রতিযোগিতা চলছে। কোন কোন সংগঠন মুক্তিযোদ্ধাকে পুরস্কৃতও করছে। নিজেদেরকে প্রকাশ করার জন্য, কাগজে তাদের নাম আর ছবি ছাপার জন্য তারা সব চেষ্টা করে যাচ্ছে। কে যে আসল মুক্তিযোদ্ধা তা বুঝা মুশ্কিল হয়ে পড়ল। তখন আমার ইচ্ছে হল প্রবাসে মুক্তিযুদ্ধ আসলে কারা করেছে। তাদেরকে খোজে বের করতে হবে এবং তাদের যথাযোগ্য সম্মান দিতে হবে।

বাংলাদেশের মানুষ জানে না মুক্তিযুদ্ধে প্রবাসীর দান কত। তারা কি করেছে। দীর্ঘ ছয় বছর সময় নিয়ে আমি যোগার করেছি সত্যিকার ইতিহাস। লিখেছি “স্বপ্ন নগরী নিউইয়র্ক”। তাতে এইসব দেশপ্রেমিককে আর কিছু দিতে না পারি অন্তত কৃতজ্ঞতা স্বীকার করতে পারি, একটা ধন্যবাদ দিতে পারি। বড় কথা তাঁরা অমুক্তিযোদ্ধাদের মাঝে হারিয়ে যাবে না।

নিউইয়র্ক ছেড়ে কানাডায় আগমন। এখানে এসে কোন সংগঠনের সভায় যাই না। মাঝে মাঝে পত্রিকায় দেখি মুক্তিযোদ্ধার স্মৃতিচারণ ছাপা হয়। এসব নিয়ে মাথা ঘামাইনা। কি লাভ এসব নিয়ে কথা বলার। যে যেভাবে পারে সেভাবে চালিয়ে যাক তাতে আমার কিছু যায় আসে না।

আমার ব্যক্তিগত অভিজ্ঞতা থেকে মুক্তিযোদ্ধাদের অনেকগুলো ভাগে ভাগ করা যায়। এক: অস্ত্র নিয়ে যারা সরাসরি যুদ্ধ করেছে। দুই: রাজনৈতিক নেতাদের আত্মীয়স্বজন যারা কিছুই করে নাই, পরবর্তীতে ‘সাংঘাতিক’ মুক্তিযোদ্ধা। তারাই স্বাধীনতার স্বাদ গ্রহণ করেছে। তিন: দেশপ্রেমিক মুক্তিযোদ্ধা বিনিময়ে যারা কিছুই চায় নাই এবং পায়ও নাই। যুদ্ধশেষে যার যার বাড়ীতে চলে গেছে। কেউ তাদের খবরও নেয়নি। এখন তাদের কেউ কেউ রিক্সা চালায়, বিনা চিকীৎসায় মারা যায়, ভিক্ষা করে।

চার: সুবিধাবাদি মুক্তিযোদ্ধা যারা যেখানে সুবিধা পেয়েছে সেখানেই নিজকে বিক্রি করেছে এবং আঞ্জুল ফুলে কলাগাছ হয়েছে। পাঁচ: শোল ডিভিশন মুক্তিযোদ্ধা যারা লুট সন্ত্রাস খুন আর অসামাজিক কাজ করে মুক্তিযোদ্ধার নামে কলঙ্ক ছড়িয়েছে। ছয়: সার্টিফিকেটধারী মুক্তিযোদ্ধা যারা সার্টিফিকেট যোগার করে অফিস আদালতে সুবিধা নিয়েছে। সাত: আহত মুক্তিযোদ্ধা। তাদের দুটি ভাগে ভাগ করা যায়। যারা যুদ্ধক্ষেত্রে যুদ্ধরত অবস্থায় আহত হয়েছে। আর এক ভাগ আহত মুক্তিযোদ্ধা যারা যুদ্ধে যায়নি অথচ আহত হয়েছে।

তাদের কেউ কেউ হয়ত যুদ্ধে যাবার ইচ্ছেও ছিল না। দেশের ভিতরেই আত্মরক্ষার্থে পালিয়ে থাকা অবস্থায় জলাদ বাহিনীর হাতে ধরা পরে প্রান দিয়েছে, কেউ কেউ অমানুষিক অত্যাচারে আহত অবস্থায় প্রাণে বেচে গেছে। তাদের

কেউ কেউ মিডয়ার সাথে জড়িত বলে তাদের নাম সারা দেশে বিখ্যাত মুক্তিযোদ্ধা হিসেবে পরিচিতি পেয়েছে। অথচ যুদ্ধে যাবার কোন ইচ্ছে তাদের ছিলনা।

তেমনি একজন মুক্তিযোদ্ধার একটি সাক্ষাতকার দেখলাম স্থানীয় একটি পত্রিকায়। এক প্রশ্নের জবাবে তিনি বলেছেন, তিনি গান, গান পাউডার ইত্যাদি বহন করতেন এক জায়গা থেকে অন্য জায়গায়। গান কথাটা বুজলাম, কিন্তু পাউডার দিয়ে কি করতেন তা বুজলাম না। কারন নয়মাস যুদ্ধে কোথাও কেউ পাউডার বহন করেছে কিনা শুনিনি। তারপর আছে স্বঘোষিত মুক্তিযোদ্ধা।

এই মুক্তিযোদ্ধাদের প্রবাসেই দেখা পাওয়া যায়। মুক্তিযোদ্ধাদের নামের আগে বা পেছনে থাকে তাদের পদবী, মুক্তিযুদ্ধে কৃতিত্বের জন্য খেতাব ইত্যাদি। নামের আগে থাকে বীর, সাহসি বা অন্য কোন বিশেষণ। কানাডায় এসে দেখা পেলাম “মহা” মুক্তিযোদ্ধার। এটাই বোধ হয় শেষ বিশেষণ শুনলাম। আগে কখনও কোথাও শুনিনি। হয়ত বা মহা কোন কাজ করেছেন।

একাত্তরের স্মৃতিকথা এবং তারপর ..

মোলা বাহাউদ্দিন

৫ম পর্ব

এরচেয়ে কষ্টদায়ক আর কিছু হয় না

লেখা ও ছবি পাঠান এই ঠিকানায়
bkprobas@yahoo.com

চোখ রাখুন প্রবাসী পাঠকরা



জোড়ের কোণ

সত্তাহের একটি দিন এখন শুধুই প্রবাসীদের জন্য। পৃথিবীর যে প্রান্তেই থাকুন না কেন প্রবাস জীবনের হাসি-আনন্দ, সাক্ষা-ব্যর্থতা, উৎসব-আয়োজন এখন থেকে উঠে আসবে ভোরের কাগজের পাতায়। প্রবাসী বাংলাদেশীরা তাদের ভাবনা, ভিন্ন দেশে বাংলা সংস্কৃতির চর্চা, আর নিজেদের নানা আয়োজনের কথা লিখে জানান ভোরের কাগজের মাধ্যমে। লেখা ও ছবি পাঠান bkprobas@yahoo.com এই ই-মেইল ঠিকানায়।
প্রবাসীদের জন্য শিগদিই আসছে "প্রবাসে বাংলাদেশ"

রিয়াজউদ্দিন মোল্লা। একাত্তরের রণাঙ্গণের এক কিশোর মুক্তিযোদ্ধা। মাত্র ১৩ বছর বয়সে বাড়ি থেকে পালিয়ে অংশ নিয়েছেন স্বাধীনতা সংগ্রামের লড়াইয়ে। বর্তমানে ইটালীতে প্রবাস জীবন কাটানো মুক্তিযোদ্ধা রিয়াজউদ্দিন মোল্লা নিজ জবানীতে বর্ণনা করেছেন যুদ্ধ পরবর্তী সময়কালে তার সংগ্রাম আর বেদনার কথাঃ

আমার বয়স তখন ১২/১৩ হবে। তখনই বঙ্গবন্ধুর ঘোষণা দেশকে স্বাধীন করতে হবে। এরপর থেকে আমার মাথায় একটাই চিন্তা আমি যুদ্ধ করবো। বর্তমান বি-বাড়িয়া জেলার কসবা থানার গানপুর গ্রামে আমাদের বাড়ি। ও ভাই ও বোনের মাঝে সবার ছোট আমি। কাউকে কিছু না বলে আমি আগরতলা চলে যাই। চারপাড়া হাইস্কুল মাঠে আমি সহ অনেক লোক ট্রেনিংয়ের জন্য দাঁড়িলাম। বাংলাদেশের একজন পুলিশের হাবিলদার ও ইন্ডিয়ান আর্মি অফিসার মিলে পছন্দ করে করে লোক নিচ্ছিল। একে একে সবাইকে নিলো শুধু আমি বাদ পড়লাম। আমি তখন তাকে হাতে ধরে জিজ্ঞাসা করলাম আমাকে কেন নিবেন না? তিনি বললেন তুমি তো দুধের শিশু তুমি কি যুদ্ধ

মরুপলাশ গ্রুপ অব পাবলিকেশন্স রিয়াদ, সউদীআরব কর্তৃক প্রকাশিত।। পৃষ্ঠা # ০২/০৪

প্রকাশকালঃ ০২বৈশাখ ১৪১৭বাঙলা। ১৫এপ্রিল ২০১০

করবে, তুমি পারবে না। আমি আমার সিদ্ধান্তে অটল। আমি বললাম আমি পারবো। আমি রাইফেল দিয়ে পাঞ্জাবি মারবো। তখন রিক্রুট করছিলেন রাজপুত অফিসার। তিনি আমাকে গাড়িতে উঠতে বললেন। আমাদের নিয়ে যাওয়া হলো তেলিয়া পাড়া চা-বাগানে। সেখানে ৬/৭ দিন থাকার পর অন্য আরো অনেকের সঙ্গে আমাকে নিয়ে যাওয়া হলো তৈসাং নামের গহিন জঙ্গলে। সেখানে আমাদের ট্রেনিং দেন রাজপুত অফিসার।

সেখানে আমার সঙ্গে দেখা হয় আমাদের গ্রামের চাচা মোঃ আলি, গোপিনাথপুরের হারিস ভাই, ধনু ভাই, শাহজাহান ভাইয়ের সঙ্গে। ট্রেনিং শেষ হওয়ার পর আমাদের পাঠানো হলো ২ নং সেক্টর মেজর হায়দার স্যারের আড্ডারে মেলাঘরে। এরপর আমাদের দেবীপুর ক্যাম্পে পাঠিয়ে দেয়া হয়। সেখানে দেখা হয় ক্যাপ্টেন হারুন উর রশিদ বর্তমানে অবসরপ্রাপ্ত মে.জে বীরবিক্রম, ক্যাপ্টেন কবির, নায়েক নুরুল ইসলামের সঙ্গে।

আমি সত্যিই ভাগ্যবান যে আমি তাদের সঙ্গে যুদ্ধ করতে পেরেছি। আমরা যেসব এলাকাতে যুদ্ধ করেছি তার মধ্যে উল্লেখযোগ্য হলো কসবার যুদ্ধ, লতুয়া মোড়ার যুদ্ধ, কর্নাল বাজারের যুদ্ধ। কর্নাল বাজারে শহীদ হন আজগর ওস্তাদ। আমি যখন আহত হয়ে বিশ্রামগঞ্জ মুক্তিযোদ্ধা হাসপাতালে যাই তখন অনেকেই ভাবতে পারেনি ছোট একটা বাচ্চা ছেলে যুদ্ধে আহত হয়েছে। যুদ্ধ পরবর্তীকালে মুক্তিযোদ্ধাদের কোনো ট্রাস্টে কাজ না পেয়ে চাইনিজ রেস্টুরেন্টে কাজ করতাম।

একদিন ক্যাপ্টেন কবির স্যার আমাকে রেস্টুরেন্টে দেখে চিনতে পেরে বললেন তুমি তো যুদ্ধে আহত মুক্তিযোদ্ধা, তুমি তো সরকারের কাছ থেকে আর্থিক সহায়তা পাবে। তিনি আমাকে মুক্তিযোদ্ধা কল্যাণ ট্রাস্টে যোগাযোগ করতে বলেন। কিন্তু সেখানে কোনো সহায়তা পাওয়া তো দূরের কথা উল্টো আমি এতো ছোট বয়সে মুক্তিযুদ্ধে অংশ নিয়েছিলাম কিভাবে—এ ধরনের কথাও শুনতে হয়। একজন যুদ্ধে আহত মুক্তিযোদ্ধার জীবনে এরচেয়ে কষ্টদায়ক আর কিছু হতে পারে কীঃ।

=====

কিছুদিন আগে মানে জানুয়ারি ২০১০ সালের কোন এক তারিখে ভোরের কাগজে উপরের লেখাটা দেখলাম। অনেক কথা মনে পড়ে গেল। যাকে নিয়ে এই লেখা সে আমার আদরের কনিষ্ঠ ভাই। এখন ইটালিতে আছে। ভোরের কাগজের কোন এক সহৃদয় সাংবাদিক বেড়াতে গিয়ে রিয়াজের সাথে পরিচয়। তারপর এই লেখা। তার কথা একবার উল্লেখ করেছি। দুঃখের সেক্টরের কনিষ্ঠ মুক্তিযোদ্ধা যে যুদ্ধে আহত হয়েছিল।

স্বাধীনতার পর তার খবর কেউ নেয়নি। দ্বারে দ্বারে ঘুরে সে কারও কোন সহযোগিতা পায়নি। আর আমি তখন নিজেকে নিয়েই ব্যস্ত। টিকে থাকার জন্য। তখন জিয়াউর রহমানের যুগ শুরু হয়েছে। মুক্তিযোদ্ধা বলে পরিচয় দিতেও ভয়। কোন্ কারণে কখন ঝুলিয়ে দিবে কে জানে! রিয়াজের কথা চিন্তা করার অবস্থা তখন আমার নেই। কোন রকমে দেশ থেকে পালিয়ে বাঁচতে পারলেই হল। সামারি মার্শাল ল কোর্ট থেকে সসন্মানে খালাস পাবার পরই দড়ি ছিঁড়লাম।

রিয়াজ তার লেখায় এক জায়গায় উল্লেখ করেছে যে ক্যাপ্টেন কবিরের সাথে তার দেখা হয়েছিল। জনাব কবির রিয়াজকে মুক্তিযোদ্ধা কল্যাণ ট্রাস্টে যোগাযোগ করতে উপদেশ দিয়েছেন। কিন্তু তিনি নিজে কিছু করেননি। তিনি জানেন রিয়াজ বয়সে ছোট এবং বুদ্ধি খাটিয়ে কিছু করতে পারবে না। যদি রিয়াজের প্রতি সত্যি তাঁর দরদ থাকত তাহলে তিনি নিজে কিছু করতে চেষ্টা করতেন। তা করেননি। কারণ সবাই যার যার তালে আছে। শুধু কবির সাহেব নন, সবাই। কে কোন্ দিকে কি সুযোগ পাবে তা নিয়েই ব্যস্ত। অন্যের চিন্তা করার সময় কারও নেই। তেমনি করে প্রতিটি মুক্তিযোদ্ধা উপেক্ষিত।

যার অধিনে যে মুক্তিযোদ্ধা ছিল সেই কমান্ডার যদি তাদের প্রতি খেয়াল রাখতেন তাহলে মুক্তিযোদ্ধারা না খেয়ে মরত না। ভিক্ষা করত না। আর আজকে ভূয়া মুক্তিযোদ্ধায় দেশ ছেয়ে যেত না। সত্যিকার মুক্তিযোদ্ধার তালিকা সঠিকভাবেই তৈরি হত। স্বাধীনতার পর প্রত্যেকে নিজেদেরকে নিয়েই এমন ব্যস্ত হয়ে পড়ল, যে অন্যের কথা কেউ

ভাবেনি। সত্যিকার মুক্তিযোদ্ধার কোন মূল্যায়ন হয়নি। গ্রামের অশিক্ষিত মুক্তিযোদ্ধারা যুদ্ধশেষে যার যার বাড়ী চলে গেছে। তারা আজও জানে না কিভাবে কোথায় গেলে বেচে থাকার একটা পথ হবে। যাদের পথ দেখানোর কথা তারা নিজেদের পথ খুঁজে বেড়াচ্ছে, উপরে উঠছে। কে রিক্সা চালায়, কে না খেয়ে মারা যায়, কে বিনা চিকিৎসায় মারা যায় সেসব দেখার সময় তাদের নেই।

- ০ -

মরুপলাশ গ্রুপ অব পাবলিকেশন্স রিয়াদ, সউদীআরব কর্তৃক প্রকাশিত।। পৃষ্ঠা # ৩৪/৩৪

প্রকাশকালঃ ০২বৈশাখ ১৪১৭বাঙলা। ১৫এপ্রিল ২০১০

www.marupalash.net

e-mail: marupalash@gmail.com